

ԶՈՐԱՎՈՐ ԱՎԵՏԱՐԱՆԸ



*Արարատյան Հայրապետական Թեմի
Չորավոր Ս. Աստվածածին եկեղեցի*

«ԶՈՐԱՎՈՐ» ԱՎԵՏԱՐԱՆ
ЕВАНГЕЛИЕ «ЗОРАВОР» (Всемогущий)
«ZORAVOR» (Powerful) GOSPEL



Մատթեոս ավետարանիչ (ՄՄ ձեռ. Հ^ֆ 4060, էջ 11բ)
Mateos evangelist (рук. Матенадарана N 4060, 11б)
Matheos evangelist (Ms 4060 of Matenadaran, 11b)



ЦЕРКОВЬ СВ. БОГОРОДИЦЫ «ЗОРАВОР»
THE CHURCH OF ST. ASTVATSATSIN «ZORAVOR»

АРСЕН АРУТЮНЯН
АРПИНЕ СИМОНЯН

ARSEN HARUTYUNYAN
ARPINE SIMONYAN



ЕВАНГЕЛИЕ «ЗОРАВОР» (Всемогущий)

«ZORAVOR» (Powerful) GOSPEL

ЕРЕВАН YEREVAN
2016

ԵՐԵՎԱՆԻ ԶՈՐԱՎՈՐ Ս. ԱՍՏՎԱԾԱԾԻՆ ԵԿԵՂԵՑԻ

ԱՐՍԵՆ ՀԱՐՈՒԹՅՈՒՆՅԱՆ

ԱՐՓԻՆԵ ՍԻՄՈՆՅԱՆ



ԶՈՐԱՎՈՐ ԱՎԵՏԱՐԱՆԸ

ԵՐԵՎԱՆ
2016



ԳԻՐ ՕՐՀՆՈՒԹՅԱՆ

«Մի հարցնէք, ի՛նչ է, ու՛ր է, ու՛րկե կուգայ հայի հոգին:
Մեր պապերու հնադարեան դպրութիւնն է ու հին լեզուն,
Զմեռ բուքին, Նարեկացու վանքի խոցին ճրագն է ան.
Մագաղաթէ հին, հին մատեան տաղարանի
Ու Մեսրոպի գերեզմանին ու երագին Այբբենագիմն է հայու ոգին»:
ՀԱՄԱՍՏԵՂ

Հայոց ազգի անսպառ ոգեղենությամբ շաղախված և հարուստ ներաշխարհի, տիեզերածավալ մտքի արտահայտությունն են Մատենադարանի ձեռագիր գանձերը:

Այդ հուշ-մատյանները հայոց մշակույթի ոսկյա էջերն են, հայի բազմադարյա հոգևոր ժառանգության և խիզախումների խոսուն վկաները, որոնց մի մասն օժտված է հրաշագործություններով, բժշկելու և դարմանելու զորությամբ. «Ժամանակ ինչ ժամահար եղէ եւ րեսի զօրութիւն սուրբ Աւերարանիս, որ բազմաց ականաւրես իսկ են եղեալ բժշկութիւն սորա, որ կոչի Վիշապկենց Աւերարան» («Զորավոր» Ավետարանի կազմողի հիշատակարանից, էջ 242ա):



Այս վկայությունը վերաբերում է «Զորավոր» անունը կրող Ավետարանին, որը հրաշագործությամբ բժշկում է հիվանդներին:

Գովելի է «Զորավոր Ավետարանը» աշխատության նախաձեռնումը: Այս ուսումնասիրությունը պատմական անցքերի անփոխարինելի շտեմարան է և ընթերցվում է բավականին հետաքրքրությամբ: Ալբոմում ամփոփված են Ավետարանի ստեղծման և նրան բաժին ընկած «փորձությունների», տեղահանումների հետաքրքրաշարժ պատմությունները, որոնք ընթերցողին մտովի տանում են ետ՝ հեռու-հեռուներ՝ մասնակիցն ու ականատեսը դարձնելով զորավոր գրքի հետ առնչվող հետաքրքրաշարժ իրադարձություններին: Առավել ուշագրավ են մասնագետների կողմից ներկայացված ուսումնասիրությունները, որոնք վերաբերում են Ավետարանի «Զորավոր» կոչվելու ավանդությանը, հիշատակարաններին, գրչական և մանրանկարչական առանձնահատկություններին:

Մեր օրհնությունն ենք բերում այս արժեքավոր ալբոմ-աշխատության հեղինակներին և հայցում Բարեխնամ Աստծո զորակցությունն ու աջակցությունը՝ հայոց մտավոր անդաստանների ոսկյա էջերը կյանքի կոչելու սրբազնագույն գործում:

Ջերմագին սիրով և օրհնությամբ՝
ՆԱՎԱՍԱՐԴ ԱՐՔԵՊԻՍԿՈՊՈՍ ԿՃՈՅԱՆ

ՀՏԴ 09 : 27
ԳՄԴ 76.11 + 86.37
Հ 422

*Հրատարակվում է օրհնությամբ՝ Արարատյան Հայրապետական Թեմի
Առաջնորդական Փոխանորդ
Տ. Նավասարդ Արք. Կճռյանի*

*Նախաձեռնությամբ՝ Ձորավոր Ս. Աստվածածին եկեղեցու հոգևոր հովիվ
Տ. Գրիգոր քահանա Գրիգորյանի*

Մեկենասությամբ՝ Գեղամ և Արամ Դուկասյանների.

*Ի հիշատակ վաղամեռիկ ծնողների՝
Էդիկ Դուկասյանի և Ջուլիետա Բեգլարյանի*

*Խմբագիր՝ Գևորգ Տեր-Վարդանյան
Մաշտոցյան Մատենադարանի գլխավոր ավանդապահ*

Հարությունյան Ա., Սիմոնյան Ա.

Հ 422 Ձորավոր Ավետարանը. պատկերագիրք-ուսումնասիրություն/
Ա. Հարությունյան, Ա. Սիմոնյան.- Եր.: Նահապետ, 2016, 64 էջ:

«Ձորավոր Ավետարանը» խորագիրը կրող սույն աշխատությունը նվիրված է Մաշտոցյան Մատենադարանի Հ^մ 4060 «Ավետարան» ձեռագրին, ուր փորձ է արվում առաջին անգամ հանգամանալիքնության ենթարկել գրչագրի ստեղծման, ապա տարբեր վայրեր փոխադրվելու պատմությունը: Հատուկ ուշադրություն է դարձվել Ավետարանի կազմի նկարագրությանը, գրչարվեստին ու մանրանկարչությանը: Ուսումնասիրությանը կից տրվում է նաև ձեռագրի ընդարձակ նկարագրությունը:

ՀՏԴ 09 : 27
ԳՄԴ 76.11 + 86.37

ISBN 978-9939-856-22-3

© Ձորավոր Ս. Աստվածածին եկեղեցի, 2016
© Հարությունյան Արսեն, 2016
© Սիմոնյան Արփինե, 2016

ԵՐԿՈՒ ԽՈՍՔ

Մաշտոցյան Մատենադարանի ձեռագրական հավաքածուն հայ ժողովրդի պատմության հոգևոր ու մշակութային արժեքների անմիջական խտացումն է: Միջնադարի տարբեր շրջափուլերում՝ Մաշտոցյան գրերով կերտված տարաբնույթ բովանդակության ձեռագիր մատյաններն ստեղծվել են Հայաստանի ու նրա սահմաններից դուրս գտնվող շուրջ 1500 գրչակենտրոններում. վերջիններս հիմնականում գործել են վանական համալիրներին, եկեղեցիներին ու դպրոցներին կից, ինչով էլ պայմանավորված՝ գրիչներն ու ծաղկողները մեծ մասամբ հոգևորականներ են եղել:

Մատենադարանի մի շարք ձեռագրեր հայտնի են իրենց գրչական ու մանրանկարչական արվեստի բացառիկ կատարելությամբ, ինչպես օրինակ՝ Թորոս Ռոսլինի, Մարգարեի, Գրիգոր Ծաղկողի, Մոմիկի, Թորոս Տարոնացու, Սարգիս Պիծակի և ուրիշների նկարագարող ձեռագրերը (ՄՄ ձեռ. Հ^մ 206, 2743, 5786, 6288, 6792, 10450 և այլն), որոշներն էլ հայտնի են դարձել իրենց գործությամբ, հրաշագործությամբ, բժշկելու կարողությամբ, ըստ այդմ էլ «մկրտվել» են նաև «հրաշագործ», «խնդրակատար», «գորավոր» և այլ անուններով:

Մատենադարանի՝ Հ^մ 4060 «Ջորավոր» անունն ստացած Ավետարանին է նվիրված մեր սույն պատկերագիրք-ուսումնասիրությունը, որը վերջին տարիներին, Արարատյան հայրապետական թեմի փոխանորդ Նավասարդ արքեպիսկոպոս Կճոյանի օրհնությամբ, Ս. Մովսես Տաթևացի հայրապետի հիշատակության օրը՝ մայիսի 14-ին, Մաշտոցյան Մատենադարանից տարվում է Ջորավոր Ս. Աստվածածին եկեղեցի՝ հնարավորություն ընձեռելով հավատացյալներին հաղորդվելու ու գործություն ստանալու Ս. Ավետարանից:

2015 թ. մայիսի 14-ին, Ս. Մովսես Տաթևացի հայրապետի հիշատակության ու Հոգեգալստյան տոնի օրը, երբ «Ջորավոր» Ավետարանը հերթական անգամ Ջորավոր Ս. Աստվածածնի Ս. Սեդանին էր, եկեղեցու հոգևոր հովիվ Տ. Գրիգոր քահանա Գրիգորյանի առաջարկով նախաձեռնեցինք Ավետարանի մասին ամփոփ մի աշխատություն կազմել, որի նպատակն է հանրությանն ու հավատացյալներին հաղորդակից դարձնել՝ մինչ օրս պատշաճ ուշադրության չարժանացած մագաղաթյա հուշարձանի ստեղծման ու տարբեր վայրեր փոխադրվելու պատմությանը, գրչարվեստին, մանրանկարչությանը, հիշատակարաններին և, վերջապես, «Ջորավոր» կոչվելու ավանդույթյանը:

ԶՈՐԱՎՈՐ ԱՎԵՏԱՐԱՆԸ (Մաշտոցյան Մատենադարանի ձեռ. Հ^Թ 4060)

Ա. «Ձորավոր» Ավետարանի տեղեման ժամանակն ու հիշատակարանները:
«Ձորավոր» Ավետարանի և կիլիկյան նշանավոր՝ «Սմբատ Գունդատարի» Ավետարանի (ՄՄ ձեռ. Հ^Թ 7644) մանրանկարչության ու գրչության բազում ընդհանրությունները թույլ են տվել վաստակաշատ ձեռագրագետ Ա. Մաքևոսյանին ենթադրել, որ առաջինը նույնպես գրվել ու նկարագրվել է Կիլիկիայում՝ ԺԳ. դարում¹, մինչդեռ ակադ. Լ. Խաչիկյանը, ԺԵ. դարի հիշատակարանների ժողովածուի առաջին հատորում, ձեռագրի հիշատակարանը դնում է Հայոց ՊԾԴ. (1405) թվականի տակ՝ բացատրելով, թե հիշատակարանի գրության ժամանակ Լենկ-Թեմուրը դեռ կենդանի էր, ուստի գրված պետք է լինի մինչև 1405 թ., քանի որ վերջինս մահացել է նշված թվականի փետրվարի 18-ին²: Ըստ Լ. Խաչիկյանի՝ ձեռագիրը գրվել է Երևանում, իսկ գրիչը Մանուել եպիսկոպոսն է: Նկատենք, որ համաձայն հիշատակարանի՝ Երևանցի Վիշապի³ (Ուշապի) որդի Հակոբը դառն ու ծանր ժամանակներում իր «հալալ արդեանց» գնում է ձեռագիրն ու մեկ ձեռք զգեստի և արծաթյա սկիհի հետ միասին ընծայում Երևանի Երկուերեսնի (երկու բեմանոց) եկեղեցուն: Ձեռագրի գնման ու ընծայման այս պատմությունն ամփոփված է մագաղաթյա մատյանի վերջում ավելացված թղթյա երկու էջերի հիշատակարանում (էջ 243ա-4բ)՝ գրված Բջնիի և Այրարատի հաջորդ (առաջնորդ) Մանուել եպիսկոպոսի ձեռքով: Ստացվում է, որ մենք գործ ունենք ձեռագրի ոչ թե գրչության, այլ ստացողի հիշատակարանի հետ և Մանուել եպիսկոպոսի գրչին վերագրել ողջ ձեռագիրը, այնքան էլ համոզիչ չէ⁴:

Մոտավորապես ԺԴ. դարավերջին «Ձորավոր» Ավետարանը տեղափոխել են Երևան, որտեղ էլ Երևանցի Վիշապի ու Ջանանի որդի Հակոբը գնել է այն ու ընծայել Երկուերեսնի կոչվող եկեղեցուն՝ իր, ծնողների, կնոջ ու զավակների հիշատակին: Այդ մասին կարդում ենք հիշատակարանում (մեջբերում ենք հատվածաբար)⁵. **«Արդ, ես՝ անա[ր]ժամս եւ անալիտանս ի յորունց եւ ի նմանեաց**

¹ **Ա. Մաքևոսյան**, Երևանի գրչության կենտրոնները, «Երևանի հոբելյանը». քաղաքի 2750-ամյակի հոբելյանական տարեգրություն, հեղինակ-կազմող՝ **Ա. Վ. Խաչիկյան**, Երևան, 1972, էջ 114-115:

² ԺԵ. դարի հայերեն ձեռագրերի հիշատակարաններ, մասն առաջին, կազմեց՝ **Լ. Ս. Խաչիկյան**, Երևան, 1955, էջ 49-50:

³ *Վիշապ* արական անձնանունը ստուգաբանելիս Հր. Աճառյանը հիշատակում է Հակոբ Երևանցուն, որը մի Ավետարան է ստացել ու նվիրել Երևանի եկեղեցուն: Հոր անունով Ավետարանը կոչվել է *Վիշակենց*, այսինքն՝ *Վիշապենց*: Տե՛ս **Հր. Աճառյան**, Հայոց անձնանունների բառարան, հ. Ե., Երևան, 1962, էջ 122:

⁴ Երևանի պատմությունը շարադրելիս՝ Թ. Հակոբյանը, քաղաքի հուշարձանների կազմում, հիշատակում է նաև Երկուերեսնի եկեղեցին, որտեղ նաև ձեռագրեր են ընդօրինակվել: Հետևելով Լ. Խաչիկյանին՝ նա ձեռագիրը թվագրում է 1405 թվականով և համարում Երևանից մեզ հայտնի ամենահին մատյանը՝ գրված Մանուել եպիսկոպոսի ձեռքով: Տե՛ս **Թ. Խ. Հակոբյան**, Երևանի պատմությունը. հնագույն ժամանակներից մինչև 1500 թ., Երևան, 1969, էջ 289:

⁵ Հիշատակարանն ամբողջությամբ տե՛ս գրքույկիս վերջում՝ ձեռագրի ընդարձակ նկարագրության մեջ:

իմոց, Յակովբ կոչեցեալ՝ որդի Վիշապին, գեղաքաղաքէն Էրեւանոյ... բարեգութն Աստուած... ընդունելի արար գաղաչանս մեր եւ բերեալ հանդիպեցոյց պատահմամբ ի դրունս մեր զաստուածախաւս ըզբրիստոսայաքաք սուրբ Աւետարանս, ի ձեռն վաճառողաց անգին մարգարտիս... կամաւք Արարչին ստացայ զհոգեւորկանք սուրբ Աւետարանս ի հալալ արդեանց իմոց՝ յիշատակ ինձ եւ ծնողաց ի[մ]ոց եւ ամենայն արեան մերձաւորաց առ ի Քրիստոս ննջեցեալ հարն իմոյ՝ Ուշապին եւ մար իմոյ՝ Ջանանին եւ կենակից իմոյ՝ Մամախաթունին...:



Ես՝ Յակոբս, զաստուածախաւս սուրբ Աւետարանս, եւ մէկ ձեռն սգեստ եւ սկիհ արծաթի, որ ստացա ի հալալ արդեանց իմոց, ընձայեցի Էրեւանո իրաշալի եւ յորդոր ժամատեղացս... ի դուռն սրբոյ Երկուերեսնիս, յիշատակ իւր եւ ամենայն ազգայնոց իւր»⁶:

Ավետարանը գնելիս Հակոբին աջակցել է նրա զոքանչ Էսուգանը. «Նաեւ ծերացեալ զոքանչին իմո Էսուգանին, որ աւգնական եղել ի գին սուրբ Աւետարանիս»⁷:

Մանուել եպիսկոպոսն իր «ստորագրութիւնը» թողել է հիշատակարանի վերջում՝ հետևյալ չափածո տողերում. «**Զտէր Մանուիէլ՝ համբակ վերջին / Յաջորդ Բըջնոյ ու Այրարադին, / Որ ծըրեցի ծայրօք մատին, / Զյիշատակաց զիծս վերջին...**»⁸:

ԺԵ. դարավերջին, ձեռագիրը կազմողի կամ նորոգողի հիշատակարանում, Երկուերեսնի եկեղեցու սպասավոր Ներսես Մոկացին վկայում է, որ ի պատիվ նվիրատուների՝ «Վիշապկենց» կոչվող Ավետարանը հիշյալ շրջանում արդեն հռչակված էր իր գործւթյամբ և շատերն ականատես էին եղել ձեռագրի բժշկության գործւթյանը. «**Ժամանակ ինչ ժամահար եղէ եւ տեսի գործութիւն սուրբ Աւետարանիս, որ բազմաց ականատես իսկ են եղեալ բժշկութիւն սորա, որ կոչի Վիշապկենց Աւետարան**»⁹:

Ներսես Մոկացին տեղեկութիւններ է հաղորդում նաև ձեռագրի վիճակի մասին, որը. «...բայքայեալ եւ խաղխտե[ա]լ էր», ուստի իր իսկ միջոցներով ձեռագիրը վերստին նորոգել ու կազմել է տալիս՝ ձեռամբ Ջաքարիա երեցի. «**Նստու հալալ վաստ[ակ]ոց իմոյ վերըստին նորոգել եւ կազմել յիշատակ հոգոյ իմոյ եւ ծնողաց իմոց...**»¹⁰:



Հատվածներ ստացողի հիշատակարանից, էջ 243ա, 244բ


⁶ ԺԵ. դարի հայերեն ձեռագրերի հիշատակարաններ, մասն առաջին, էջ 49-50:

⁷ Նույն տեղում, էջ 49:

⁸ Նույն տեղում, էջ 51:

⁹ Նույն տեղում:

¹⁰ Նույն տեղում:



Կազմողի (նորոգողի)
հիշատակարանը, էջ 242ա

հավելյալ տեղեկություն չի հաղորդում: Երկուերեսնի եկեղեցին, Երևանի միջնադարյան հուշարձաններին նվիրված իր մենագրության մեջ չի հիշատակում նաև հնագետ-վիմագրագետ Կ. Ղաֆադարյանը: Եկեղեցու մասին համառոտ տեղեկություն ենք գտնում ԺԷ. դարի պատմագիր Առաքել Դավրիժեցու երկասիրության մաս կազմող Հովհաննիսի Ծարեցու ժամանակագրության մեջ¹², ուր նկարագրվում է 1583 թ. Մուրադ խոնդկարի¹³ հրամանով Ֆահրադ գորապետի գլխավորությամբ գործերի հարձակումը Երևանի վրա, որի ժամանակ քաղաքում բազմաթիվ ավերումներ են եղել ու եկեղեցիներ կործանվել. «...կամեցան զմեծ եկեղեցին ևս, որ Երկու երեսի ասի, քակել, իսկ ոմն վարդապետ Առաքել անուն, որ և յետոյ կաթողիկոս եղև, յիշատակ նորին օրհնութեամբ եղիցի, եմուտ առաջի Ֆահրատին գորապետի գորում, և ոչ ետ թոյլ քակելոյ զեկեղեցին»¹⁴:

¹¹ Նույն տեղում:

¹² Հովհաննիսի Ծարեցու ժամանակագրությունն իբրև Առաքել Դավրիժեցու երկի ինքնուրույն ԾԵ. գլուխ առկա է մեզ հայտնի գրեթե բոլոր ձեռագրերում: Այն հրատարակվել է նաև Մ. Մսերյանցի «Շոթաբաղում» (Մոսկվա, 1859), Սամուել Անեցու ժամանակագրությանը կից (Վաղարշապատ, 1893). առանց խորագրի այն կարելի է գտնել նաև ՄՄ Հ^տ 2776 և Հ^տ 8245 ձեռագրերում: Տե՛ս **Առաքել Դավրիժեցի**, Գիրք պատմութեանց, աշխատասիրությամբ **Լ. Ա. Խանդարյանի**, Երևան, 1990, էջ 533, ծանոթ. 433:

¹³ Խոնդկարը (խոնդքար) թագավորն է, տաճկական սուլթաններին տրվող տիտղոս: Տե՛ս **Ա. Մարգարյան**, Արևմտահայերենի բառարան, Երևան, 1991, էջ 154:

¹⁴ **Առաքել Դավրիժեցի**, էջ 461:

Այս հիշատակարանը Լ. Խաչիկյանը քվագրում է ԺԵ. դարավերջով՝ նշելով, որ այն գրված է նախորդից տասնամյակներ հետո: Հիշատակարանը վկայակոչելիս, իբրև ձեռագրի նորոգող, նա գրում է Ներսես Մոկացու անունը¹¹, մինչդեռ վերը նշեցինք, որ Ներսեսը հիշյալ ժամանակաշրջանում եղել է Երկուերեսնի եկեղեցու սպասավորը, որը տեսնելով ձեռագրի անմխիթար վիճակը, Չաքարիա երեցին հանձնարարել է այն նորոգել, հետևաբար, ոչ թե Ներսեսն է ձեռագրի կազմողը, այլ Չաքարիան:

Բ. Ձեռագրի պահպանման վայրերը - Երևանի Երկուերեսնի եկեղեցի: Վերը արդեն նկատեցինք, որ ձեռագրի և՛ ստացողի, և՛ կազմողի հիշատակարաններում վկայված է Երևանի Երկուերեսնի կոչված եկեղեցին, ըստ այդմ էլ տեղին ենք համարում անդրադառնալ երբեմնի գոյություն ունեցած ու շատերին անհայտ այդ եկեղեցուն:

Ա. Մաթևոսյանը, վկայակոչելով ձեռագրի ստացողի հիշատակարանը, ըստ որի՝ Ավետարանը ընծայել են տվյալ եկեղեցուն,

Երկուերեսնին Երևանի մեծ ու նշանավոր եկեղեցիներից մեկն է եղել, ինչպես ձեռագրի հիշատակարանում էր նշվում «...**Էրեսանո հրաշալի եւ յորդոր ժամատեղացու...**», սակայն, թե ստույգ որտեղ է այն գտնվել, դժվար է ասել:

Հովհաննես եպիսկոպոս Շահխաթունյանցն իր ուսումնասիրության վեցերորդ մասում գետեղել է Ամենայն Հայոց կաթողիկոսների գավազանագիրքը՝ սկսած Ս. Գրիգոր Լուսավորչից մինչև Հովհաննես Ը. Կարբեցին: Դառնալով Գրիգոր ԺԲ. Վաղարշապատցու (1576-1590) աթոռակից Թադևոս Բ.-ին՝ Շահխաթունյանցը ևս չի շրջանցում Հովհաննիսիկ Ծարեցու ժամանակագրության՝ Երկուերեսնի եկեղեցու առնչությամբ վերոնշյալ վկայությունը. «Առաքեալ ի սահմանացն Էջմիածնի կարգի գործակից եւ աթոռակալ Թադևոսի Բ., եմուտ առ Ֆահրատ փաշայ Օսմանցոց եւ միջնորդեալ ո՛չ ետ փակել զեկեղեցին Երկերես կոչեցեալ յԵրեսան»¹⁵: Չնայած նրան, որ Գրիգոր Վաղարշապատցու մեկ այլ աթոռակից Առաքել կաթողիկոսի (այն ժամանակ՝ վարդապետ – Ա. Հ.) միջնորդությամբ կանխվեց եկեղեցու քանդումը. «...բայց չկրցաւ արգելել զհնուորներուն իրենց ձիերով 30 օր եկեղեցոյ մէջ բնակիլը»¹⁶: Հիշյալ դեպքերի հետ կապված ինչպես Առաքել Դավրիժեցու Պատմությանը, այնպես էլ Սամուել Անեցու ժամանակագրությանը կից հրատարակված՝ նույն Ծարեցու ժամանակագրության մեջ կարդում ենք. «... աւուրս Լ. (30) ջորիք և երիվարք և բազում տաճիկք ինքեանց անծանօթք՝ բնակեցան յեկեղեցին: Եւ եղև ասացեալն ի մարգարէն, զի մտին հեթանոսքն ի ժառանգութիւն Աստուծոյ և պղծեցին զտաճար նորա սուրբ»¹⁷: Փաստորեն, եկեղեցին մի որոշ ժամանակ նաև ապաստարան ու անասնազոմ է ծառայել:

Երևանի Երկուերեսնին հիշատակում է նաև Չաքարիա Ագուլեցին, որն իր օրագրության մեջ անդրադառնում է 1674 թ. Երևանում կատարվելիք ջրօրհնեքին, որի համար. «...ԲՃ. (200) մարդ շապիք ին հաքել... ամայ առօտաց բռնեց ձուն գալն մինչի յետի ժամն: Շատ զգեստ զայ էլա... Յին քաղաքի **Բ. (2) երեսումն** զգեստավորեցին»¹⁸ (ընդգծումը մերն է – Ա. Հ.): Ագուլեցու հիշատակությունը ևս չի պարզում կառույցի գտնվելու վայրը, այլ միայն փաստում է, որ Երևանն ունեցել է նաև նման եկեղեցի, որն այդ շրջանում կանգուն է եղել: Օրագրության տեղանվանական ցանկում Ս. Տեր-Ավետիսյանը Երկուերեսնին ենթադրաբար նույնացրել է Երևանի Ս. Պողոս-Պետրոս¹⁹ եկեղեցու հետ²⁰, ինչն այնքան էլ համոզիչ չէ:

¹⁵ **Հովհաննես եպ. Շահխաթունյանց**, Ստորագրութիւն Կաթողիկէ Էջմիածնի եւ հինգ զաւառացն Արարատայ, աշխ. **Ա. Տեր-Ստեփանյանի**, Ս. Էջմիածին, 2014, էջ 151:

¹⁶ **Մաղաքիա արք. Օրմանյան**, Ազգապատում, Բ. հատոր, Ս. Էջմիածին, 2001, էջ 2650:

¹⁷ **Սամուէլի քահանայի Անեցոյ** հաւաքմունք ի գրոց պատմագրաց յաղագս գիւտի ժամանակաց անցելոց մինչեւ ի ներկայս, յառաջաբանով, համեմատութեամբ, յաւելումներով եւ ծանօթութիւններով **Ա. Տեր-Սիքեղեանի**, Վաղարշապատ, 1893, էջ 192, տե՛ս նաև **Առաքել Դավրիժեցի**, էջ 461:

¹⁸ **Չաքարիա Ագուլեցու** Որագրությունը, յԵրեվան, 1938, էջ 120-121:

¹⁹ Երևանի Ս. Պողոս-Պետրոս եկեղեցին գտնվել է հին Երևանի **Շաք** կոչվող թաղամասի կենտրոնում. կառուցված էր 1679 թ. երկրաշարժից կործանված նույնանուն եկեղեցու տեղում: Այն բազիլիկ հորինվածքով կառույց է եղել, որն ունեցել է արևմուտքից կից զանգակատուն: Եկեղեցին քանդել են 1931 թ. և տեղում կառուցել ներկայիս «Մոսկվա» կինոթատրոնի շենքը: Մանրամասն տե՛ս **Կ. Ղաֆաղարյան**, Երևան. միջնադարյան հուշարձանները և վիմական արձանագրությունները, Երևան, 1975, էջ 28-33:

²⁰ **Չաքարիա Ագուլեցի**, էջ 179:

Եկեղեցիների նույնացման այս հարցը քննության է առել նաև Թ. Հակոբյանը: Նա նախ նշում է, որ Ս. Նշան կոչված Երկուերեսնին, հավանաբար, ԺԲ-ԺԴ. դդ. կառույց էր, որը 1679 թ. երկրաշարժից հետո չի հիշատակվում: Եկեղեցին հաճախ նույնացվել է Երևանի Ս. Պողոս-Պետրոս կամ քաղաքի այլ եկեղեցիների հետ, իսկ Երկուերեսնի է կոչվել պարզապես երկու բեմ ունենալու պատճառով²¹: Թ. Հակոբյանը վկայակոչում է նաև Հ. Ժամկոչյանի ատենախոսական աշխատանքում արժարժված այն միտքը, թե նշված երկու եկեղեցիների նույնացումն անվիճելի պետք է համարել՝ հիմք ընդունելով Ս. Պողոս-Պետրոսի քանդման ժամանակ պատերի ստորին շերտում հայտնաբերված «ֆրեսկոները», ինչպես նաև ֆրանսիացի ճանապարհորդ Ժան Շարդենի այն վկայությունը, թե Երկուերեսնի եպիսկոպոսանիստ եկեղեցու դիմաց գտնվելիս է եղել մի մզկիթ, որն ըստ Հ. Ժամկոչյանի՝ նկարիչների միության կողմից ցուցահանդեսների համար օգտագործվող մզկիթն է²²:

Ըստ Թ. Հակոբյանի՝ Հ. Ժամկոչյանի պնդումը իրատեսական կլիներ, եթե Շարդենն անուղղակի կերպով չճշտեր Երկուերեսնի եկեղեցու տեղը քաղաքում, որը Ս. Պողոս-Պետրոսից բավական հեռու էր, գտնվում էր մեծ շուկա-հրապարակի մոտ, որի դիմաց կառուցված է եղել նաև մի բարձր աշտարակ: Այս հանգամանքը նկատի առնելով՝ նա չի ընդունում Հ. Ժամկոչյանի տեսակետը և հավանական է համարում, որ «Երկուերեսնի ս. Նշան հին եկեղեցին գտնվում էր հետագայում կառուցված Ս. Սարգիս եկեղեցու (որն այժմ ևս գոյություն ունի) տեղում կամ նրա մոտակայքում և կապ չունի Պողոս-Պետրոսի հետ»²³:

Երևանի պատմությանը մվիրված ուսումնասիրություններում Երկուերեսնի եկեղեցուն առավել խորը անդրադարձել են Երվանդ Շահագիզը, ապա Թադևոս Հակոբյանը: Նկարագրելով Ձորագյուղի անապատի տեղագրությունն ու համալիրի մեջ մտնող շինությունները՝ Շահագիզը նշում է, որ կաթողիկոսների իջևանատան հարևանությամբ, որ ներկայիս առաջնորդարանի տեղն է. «...շինված է յեղել ս. Գեորգ անունով կաթողիկոսական յեկեղեցին, կառուցված վաղ ժամանակներից և հիմնովին վերանորոգված Դավիթ Ենեգեթցի (1801–1807 թթ. – Ա. Հ.) կաթողիկոսի ձեռքով...»²⁴: Շահագիզը միաժամանակ նկատում է, որ ըստ Ժան Շարդենի՝ «...յեպիսկոպոսական յեկեղեցին յեղել է վոչ վերոհիշյալ ս. Գեորգը, այլ **«Յերկուերեսնի» կոչված ս. Նշանը**, վորի անունը հաճախ հիշվում է մեր հին ձեռագրերի հիշատակարաններում»²⁵ (ընդգծումը մերն է – Ա. Հ.):

²¹ Թ. Խ. Հակոբյան, Երևանի պատմությունը. հնագույն ժամանակներից մինչև 1500 թ., էջ 270:

²² Նույն տեղում, էջ 271:

²³ Նույն տեղում (հմմտ. Путешествие *Шардена* по Закавказью в 1672-1673 гг., перевод Е. В. Бахумовой и Д. П. Косовича, Тифлис, 1902, с. 242-243):

²⁴ **Երվանդ Շահագիզ**, Հին Երեւանը, Երեւան, 1931, էջ 200-201 (այսուհետև՝ Շահագիզ):

²⁵ Նույն տեղում, էջ 201: Հետևելով Շարդենին՝ Երկուերեսնին առաջնորդարանի եկեղեցի է կոչում նաև Հ. Ղևոնդ Ալիշանը. «Նոյն ճանապարհագիր (Շարտեն) վկայէ, զի եկեղեցի առաջնորդարանին էր կոչեցեալ Երկուերեսնի, որ և ընդ այլս ոմանս յիշի յամէ 1537, Երկուերեսնի Սուրբ Նշան կոչմամբ. յորմէ յայտնի նուիրեալ Սրբոյ Խաչի, կամ պահեալ ի նմին համանուն խաչի. թուի թէ և թաղն տոյնալէս անուանէր՝ Երկուերեսնու»: **Հ. Ղևոնդ Ալիշան**, Այրարատ. բնաշխարհ Հայաստանեայց, Վենետիկ, 1890, էջ 311:

Գրիգոր Դարանաղցու կամ Կամախեցու ժամանակագրության համաձայն՝ Երևանի Երկուերեսնի եկեղեցին բնավ էլ չի նույնանում Չորագյուղի Ս. Գևորգ եկեղեցու հետ: ԺԷ. դարասկզբին գալով Երևան՝ Գրիգոր Դարանաղցին նախ իջևանել է Չորագյուղի անապատում, ի մասնավորի՝ Ս. Սարգիս եկեղեցում. «Եւ մեք այլ յորժամ գնացաք ի Սուրբ Սարգիս եկեղեցին, որ ի վերայ գետոյն Հրազ-դանին էր, յայնժամն ոնց երկու օր անցաւ ի վերայ...»²⁶, ապա Երկուերեսնի եկեղեցում. «Ի միսում ատուրն ելեալ էր ի բանտէն Մելքի կատողիկոսն եւ լուեալ էր զմեր արարմունքն եւ եկն առ մեզ յԵրկու երեսէն եկեղեցին»²⁷: Շահազիզը ենթադրում է, թե Երկուերեսնի եկեղեցու մոտ ևս, ըստ ամենայնի, իջևանելու կամ բնակվելու տեղ է եղել երթևեկ հոգևորականների համար, սակայն, նրան նույնպես հայտնի չէ եկեղեցու գտնվելու ստույգ վայրը. **«Թե քաղաքի վոր մասում և հատկապես վորտեղ է շինված յեղել այդ Երկուերեսնին, վորի անունով և նրա քաղը կոչվել է «Երկուերեսնի քաղ» մենք ստուգապես չենք կարող ասել»**²⁸: Վկայակոչելով ճարտարապետ Թ. Թորամանյանի տեսակետը՝ նա նշում է, որ Երևանի երբեմնի ամենանշանավոր Երկուերեսնի Ս. Նշան եկեղեցին կառուցված է եղել Ս. Գրիգոր Լուսավորիչ եկեղեցու (1869-1900 թթ.) տեղում²⁹: Թ. Թորամանյանի վերոնշյալ կարծիքը հետագայում կրկնում է նաև Առաքել Դավրիժեցու Պատմությունն աշխարհաբար թարգմանող Վ. Առաքելյանը՝ ծանոթագրություններում գրելով հետևյալը. **«Երևանում եղել է մի մեծ եկեղեցի, որ կոչվել է Երկուերեսնի: Թորամանյանի կարծիքով այդ եկեղեցին եղել է Չարենցի այժմյան դպրոցի տեղում, որտեղ գտնվում էր Ս. Գրիգոր Լուսավորիչը: Վերջինը շինված է եղել Երկուերեսնի տեղում»**³⁰:

Եկեղեցու ավերման ստույգ ժամանակը ևս հայտնի չէ: Շահազիզի համոզմամբ՝ այս եկեղեցին Երևանի մյուս հուշարձանների պես կործանված կամ խարխլված պիտի լինի 1679 թ. հունիսի 4-ին տեղի ունեցած ավերիչ երկրաշարժից, սակայն հետագա տարիներին այստեղ գրված կամ եկեղեցուն ընծայված ձեռագրերը փաստում են, որ շատերի պես այն ևս վերանորոգվել է: Բերված վկայությունները թեև լուսաբանում, սակայն, բնավ չեն որոշակիացնում Երևանի երբեմնի մեծ ու նշանավոր եկեղեցու գտնվելու ստույգ վայրը:

Ինչպես վերը նշվեց, Երկուերեսնի եկեղեցու մասին վկայություններ են պահպանվել նաև ձեռագրերի հիշատակարաններում: Ե. Շահազիզը վկայակոչում է

²⁶ Ժամանակագրութիւն Գրիգոր վարդապետի Կամախեցոյ կամ Դարանաղցոյ, հրատարակեց՝ Մեսրոպ վարդապետ Նշանեան, Երուսաղէմ, 1915, էջ 55:

²⁷ Նույն տեղում, էջ 56: Գր. Դարանաղցու վկայություններից մեկը, որը հիշատակում է նաև Թ. Հակոբյանը, Երկուերեսնի եկեղեցու ճարտարապետական հորինվածքի տեսակետից ուշագրավ տեղեկություն է: Ժամանակագիրը նկարագրում է թուրքերի հեռանալով Եղվարդ գյուղից, որի ժամանակ այրել են տեղի վանքը. «...որ զարմանալի շէնք ունէր, որ Երեւանու Երկերեսնի կու նմանէր»: Ժամանակագրութիւն Գրիգոր վարդապետի Կամախեցոյ, էջ 579: Տե՛ս նաև Թ. Խ. Հակոբյան, Երևանի պատմությունը (1500-1800 թթ.), Երևան, 1971, էջ 364:

²⁸ Շահազիզ, էջ 201:

²⁹ Նույն տեղում:

³⁰ Առաքել Դավրիժեցի, Պատմություն, թարգմանությունը, առաջաբանը և ծանոթագրությունները՝ Վ. Առաքելյանի, Երևան, 1988, էջ 552, ծանոթ. 252:

1481 թվակիր (ձեռագրի գրչության թվականն է՝ ՉՀԴ.-1325 – Ա. Հ.) Ավետարան ձեռագրի (պետ. թանգարանի Հ^տ 94, այժմ՝ Էրմիտաժի ձեռ. Հ^տ V3–834³¹) հիշատակարանի վերջում՝ հետագայում ավելացված մի տեղեկություն, ըստ որի՝ երևանցիները որոշակի հարկ են վճարել իրենց եպիսկոպոսական ու Մայր եկեղեցուն, որով պահպանվել է Չորագյուղի անապատի իջևանատունը. *«Մեք՝ Երեսանու Դավաթաւորք եւ ռամիկ ժողովուրդս, երկու երեսու բարձր հրամանաւ զքահանայի Էջեանն զհարկն և զպահանջն ինչ ռամիկ ժողովուրդ, որ հակառակ լինի Սր. Աւետարանս նորա դատախագ լինի անեծքն ընդ Կալյէնի առջէ»*³²:

Մաշտոցյան Մատենադարանի Հ^տ 246, Երևանում՝ 1684 թ. գրված «Աւետարան» ձեռագրի հիշատակարանում կարդում ենք. *«Եւ արդ, ես՝ յետինս գրչաց և անարժանս ի քահանայից, սուտանուն Աւետիս Էրէցս, և տեսի զսէր և զփափագ Խանփարոս, յանձն առի գծագրել, այլ կարողութեամբն Աստուծոյ աւարտեցի զսա ի քաղաքս իմ յԵրևան, ընդ հովանեաւ Սուրբ Յակոբ հայրապետիս և Սուրբ Սարգիս, Սուրբ Էրկու Յէրէսիս և Սուրբ Կաթողիկէնիս, ի հայրապետութեան տեառն Եղիազարու և առաջնորդութեան Սուրբ Ամենափրկչի Լիեցի Յովանէս վարդապետի, ի դանութեան քաղաքիս Չալխանիս, ի թվականիս Հայոց ՌՃԼ Գ. (1684)»*³³: 1684 թվակիր հիշատակարանը, որն ի թիվս Երևանի նշված եկեղեցիների՝ գրվել է նաև «ընդ հովանեաւ» Ս. Երկուերեսնի, եկեղեցու՝ տվյալ ժամանակաշրջանում գոյություն ունենալու ուղղակի վկայությունն է: Մատենադարանի մեկ այլ՝ Նահապետ կաթողիկոսի պատվերով 1695 թ. Էջմիածնում գրված Հ^տ 1534 «Յայսմաւորք» ձեռագրի ծավալուն հիշատակարանում, նշյալ կաթողիկոսի իրականացրած բարենորոգչական աշխատանքների թվում վկայված է նաև Երևանի Երկուերեսնին. *«...ի թուին ՌՃԽ. (1691) վաղճանեցաւ սուրբ հայրն հոգեւոր Եղիազար կաթողիկոսն, եւ յաջորդեաց զԱթոռսն հայրապետական երջանկամեծար եւ սրբազան հայրապետս տէր Նահապետ կաթողիկոս, որ եւ ջանք ի վերայ եղեալ՝ արար աշխատանս եւ շինուածս բազումս ի վերայ առաջնոց շինուածոցն՝ թէ՛ Սրբոյ Աթոռոյս եւ թէ՛ ամենայն եկեղեցեաց Քրիստոսի: ...Այլ եւ զտաճարն Անապատին Անանիայի առաքելոյն, որ ի միջի այգեացն Երեսանայ քաղաքին, նոր վերստին ի հիմանէ կառոյց ամենայն շինուածօքն, որ ի մնա: Նաեւ զերկու եկեղեցիսն քաղաքին Երեսանայ, այսինքն՝ զԵրկու երեսին կոչեցեալ եւ զԿաթողիկէ անուանեալ, որք ի շարժմանէն ի հիմանէն իսպառ բլեալք էին, վերստին ի հիմանէ կառոյց գեղեցիկ շինուածօք»*³⁴: Բավականին ուշագրավ հիշատակարանն ուղղակիորեն հավաստում է Շահազիզի վերոնշյալ տեսակետը, համաձայն որի՝ մեծ երկրաշարժից

³¹ Սանկտ-Պետերբուրգի պետական Էրմիտաժի հայերեն ձեռագրական հավաքածուի նշված ձեռագիրը Ախալցխայի Ս. Փրկիչ եկեղեցու գրչագրերից է, որը նախորդ դարի քսանական թվականների սկզբին փոխադրվել է Երևանի Պատմության թանգարան (Հ^տ 94), 1935-ին՝ Կերպարվեստի թանգարան (Հ^տ 17), իսկ 1940-ին ՀՍԽՀ Ժողկոմսովետի որոշմամբ հանձնվել էրմիտաժին: Տե՛ս *Օճնիկ Եգանեան*, Աշխատություններ, հրատարակութեան պատրաստեց՝ Գ. Տէր-Վարդանեան, Երևան, 2014, էջ 119:

³² *Շահազիզ*, էջ 202:

³³ Մայր ցուցակ հայերեն ձեռագրաց Մաշտոցի անուան Մատենադարանի, հ. Ա., կազմեցին՝ Օ. Եգանյան, Ա. Չեյքունյան, Փ. Անթաթյան, Երևան, 1984, էջ 1070:

³⁴ Նույնի հ. Ե., կազմեց՝ Օ. Եգանեան, Երևան, 2009, էջ 394-395:



Զորավոր Ս. Աստվածածին եկեղեցին, 1693-1694 թթ.

հիմնովին ավերվել են մաս Երևանի Երկուերեսանին ու Կաթողիկեն, որոնք ԺԷ. դարավերջին վերստին կառուցել է Նահապետ Եղեսացի կաթողիկոսը:

Գ. Զորավոր Ս. Աստվածածին եկեղեցի: Չեռագրի հետագա «նակատագիրը» կապված է Երևանի՝ քննության ենթակա Ավետարանի անունով կոչվող Զորավոր Ս. Աստվածածին եկեղեցու հետ:

Ենթադրելի է, որ Երկուերեսանի եկեղեցու ավերումից կամ անշքանալուց հետո ձեռագիրը հանգրվանել է Ս. Ամանիա առաքյալի մատուռի տեղում՝ Մովսես վարդապետ Տաթևացու (հետագայում կաթողիկոս՝ Մովսես Գ. Տաթևացի – 1629-1632) հիմնած համանուն վանքում, ուր ներկայումս Զորավոր Ս. Աստվածածին եկեղեցին է՝ կառուցված Նահապետ Ա. Եղեսացի (1691–1705) կաթողիկոսի օրոք՝ 1693-1694 թթ., խոջա Փանոսի միջոցներով:

Եկեղեցու պատմությունը շարադրելիս՝ Երվանդ Շահագիզը նկատում է, որ տևական ժամանակ այստեղ պահվող մի հրաշագործ ձեռագիր Ավետարանի պատճառով Ս. Աստվածածինը կոչվել է մաս Ս. Զորավոր³⁵: Նա նշում է մաս, որ 1835 թ. եկեղեցին կամ Ս. Ամանիայի անապատը դադարել է լինել մենաստան ու դարձել է ծխական եկեղեցի՝ հանձնվելով Մարաղայի գաղթականների: Հենց մարաղացիների խոսակցական լեզվում էլ ընդհանրացվել է եկեղեցուն՝ Ս. Զորավոր կոչելու սովորությունը: Իբրև օրինակ՝ Շահագիզը բերում է ժողովրդի կողմից հաճախ լսվող հետևյալ խոսքերը. *«էն սուրբ Զորատորը վկայ, էն սուրբ Զորատորը*

³⁵ *Շահագիզ*, էջ 191: Տե՛ս մաս **Թ. Խ. Հակոբյան**, Երևանի պատմությունը (1801-1879 թթ.), Երևան, 1959, էջ 251-252:

գիտենայ», այսինքն՝ այդտեղ պահվող Ջորավոր Ավետարանը վկա, գիտենա, քանի որ մինչ ծխական եկեղեցի դառնալը վանքն առավել հայտնի է եղել իբրև Ս. Անանիա առաքյալի անապատ³⁶:

Եկեղեցու պատմությունն ու հատկապես վիմական արձանագրություններն առավել հանգամանալի քննության է ենթարկել Կ. Ղաֆադարյանը³⁷: Եկեղեցու անվանումը նա բացատրում է այսպես. **«Այժմյան եկեղեցու բուն անունը, ինչպես գիտենք արձանագրություններից և մատենագրական աղբյուրներից, Աստվածածինն է, իսկ Ջորավոր անունը նա ստացել է հետագայում, այնտեղ պահվող մի ձեռագիր մատյանի անունից, որ հրաշագործ և գորավոր է համարվել»**³⁸: Ավետարանի մասին հավելյալ տեղեկություն Կ. Ղաֆադարյանը չի հաղորդում: Ջորավոր Ս. Աստվածածին եկեղեցին Երևանի առավել հայտնի սրբավայրերից է, որը հռչակված է նաև իր «գործյամբ»՝ ի նշանավորումն «Ջորավոր» Ավետարանի:

Անհայտ պատճառներով Ավետարանը հետագայում տարվել է Արտագի Ս. Թադեոս առաքյալի վանքը և միայն 1911 թ. բերվել Էջմիածին, ապա՝ Երևան (1939 թ.), բայց այս անգամ, ինչպես Ա. Մաթևոսյանն է նշում, ձեռագիրն իր տեղն է գտնում ոչ թե. **«...ի դուռն Երկուերեսնի եկեղեցում, որ վաղուց հողին էր հավասարվել, ոչ էլ իր անունը կրող եկեղեցում, այլ «ընդ հովանեաւ» Մաշտոցյան Մատենադարանի, հպարտ իր կեսհազարամյա երևանաբնակությամբ...»**³⁹:

Մենք ունենք նաև «Ջորավոր» Ավետարանի ստեղծմանը վերաբերող բանավոր ավանդություն, ըստ որի՝ Ավետարանը գրվել է Սևանի անապատում և թշնամու ասպատակություններից մեկի ժամանակ հայտնվելով լճում՝ Հրազդան գետով հասել է մինչև Երևան: Այստեղ այն գտել է մի կին ու նվիրել Ս. Անանիա առաքյալի անապատին, որտեղ Ավետարանը մնացել է մինչև ԺԹ. դարավերջ⁴⁰:

Ամփոփելով «Ջորավոր» Ավետարանի ստեղծման, ապա տարբեր միջավայրերում հանգրվանելու վերաբերյալ տեղեկությունները, կարելի է արձանագրել, որ ամենայն հավանականությամբ, կիլիկյան դպրոցի՝ ԺԳ-ԺԴ. դդ. ծնունդ ձեռագիր Ավետարանը մոտավորապես ԺԴ. դարավերջին կամ ԺԵ. դարասկզբին գնել է Երևանցի Հակոբն ու ընծայել Երևանի Երկուերեսնի կոչվող եկեղեցուն, որտեղից էլ, հավանաբար, ԺԸ. դ. սկզբներին այն հասել է Ջորավոր Ս. Աստվածածին եկեղեցի ու մնացել այստեղ մինչև ԺԹ. դ. կեսերը:

«Ջորավոր» Ավետարանը, թերևս, Մատենադարանի այն եզակի ձեռագիրն է, որն իր անունով օժտել է նաև Երևանի Ս. Աստվածածին եկեղեցուն՝ տևական ժամանակ այդտեղ մնալու պատճառով: Ուրախությամբ պետք է փաստենք, որ ձեռագիրն այսօր իր նման հազարավոր մատյանների կողքին է և իր ուրույն տեղն ունի Մաշտոցյան Մատենադարանի հավաքածուում:

³⁶ **Շահագիզ**, էջ 192:


³⁷ Կ. Ղաֆադարյան, Երևան. միջնադարյան հուշարձանները և վիմական արձանագրությունները, Երևան, 1975:

³⁸ Նույն տեղում, էջ 37:

³⁹ Ա. Մաթևոսյան, Երևանի գրչության կենտրոնները, էջ 115:

⁴⁰ Տաթևացուց մինչև Տաթևացի, աշխատասիրությամբ՝ **Աշոտ դավի Արևշատյանի**, Երևան, 2002, էջ 69:

Դ. Ճեռագրի կազմը: Մինչ մանրանկարչությանն անցնելը՝ նշենք, որ պակաս ուշագրավ չէ նաև ձեռագրի կազմը, որը շագանակագույն դրոշմագարդ կաշի է՝ դրնակով և երբեմնի ունեցած երեք կապիչներով, որոնցից միայն ամրացման գամերն են մնացել: Արտաքին փեղկը հարդարված է 59 մեծ և 32 փոքր կոստղերով՝ կիսակլոր գլխով գամերով (14-ն ընկած, որոնցից մի քանիսի հիմք գամերը պահպանվել են) ու 6 փլաքներով, իսկ կենտրոնում ամրացված է մետաղյա խաչ՝ հետևյալ մակագրությամբ.



ՅԻԻՇԼԱՏԱԼԿ Ե ՄԲ ԽԱԼՉՍ
ԱՌԱՔԵԼԻՆ ԵՒ ԿՆՂԱԼԿՑԻՆ՝
ՈՒՂՈՒՐՍՕԼԹԱԽԻՆ ԵՒ ԴՍՏԵՐԱՅՆ՝
ՍԵՎԱՐԽԱԽԻՆ,
ՕՂԱՆՓԱՇԻՆ, ՄԱՐԻԱՄԻՆ:

Վկայված անձնանուններից մի քանիսն ուշագրավ են ու սակավադեպ: *Ուղուրսոյթան* ծագումով թուրքերեն իգական անձնանունը կազմված է *ուղուր* (բարեհաջողություն) + *սուլթան* (թագավոր) բառերից և մեզանում հիշատակված է ԺԶ. և հետագա դարերում, մասնավորապես՝ Հր. Աճառյանը վկայակոչում է 1581 և 1597 թվակիր ձեռագրերից երկու օրինակ, որոնցում նշված անձնանունը հանդիպում է *Յիւղուրսուլթան* և *Իւղուր սուլթան* անվանաձևերով⁴¹: Ինչ վերաբերում է *Սեվար-*

խան անձնանվանը, ապա կարծում ենք, որ այն *Սեվլի*, *Սալվիխան*, *Սալվիփաշա* իգական անունների փոխակերպված ձևն է, ծագում է թուրք. *sevli* (նոճի) + *պարս. xān* (իշխան) բառերից, որն ունեցել է թե՛ արական, և թե՛ իգական գործածություն⁴²: *Օղլանփաշա* ծագումով թուրքերեն իգական անձնանունը կազմված է *օյլան* (տղա, որդի) + *paşa* (փաշա) բառերից և դարձյալ հանդիպում է ԺԶ. և հետագա դարերում⁴³:

Արսեն Հարությունյան

պատմական գիտ. թեկնածու
ՀՀ ԳԱԱ հնագիտության և ազգագրության ինստիտուտ,
Մատենադարանի ձեռագրագիտության
և Մայր ցուցակի բաժնի գիտաշխատող

⁴¹ **Հր. Աճառյան**, Հայոց անձնանունների բառարան, հ. Դ., Երևան, 1948, էջ 201:

⁴² Նույն տեղում, էջ 347, 482:

⁴³ Նույնի հ. Ե., էջ 234:


Ե. «Զորավոր» Ավետարանի մանրանկարչությունը: Չեռագիրն արժեքավոր է նաև մանրանկարչական հարդարանքի տեսանկյունից: Այստեղ մենք գործ ունենք ավետարաններին հատուկ մանրանկարչական այնպիսի տարրերի հետ, ինչպիսիք են խորաններն ու կիսախորանները, ավետարանիչների մանրանկարներն ու անվանաթերթերը, լուսանցային մանրանկարները, լուսանցազարդերն ու զարդագրերը:

Խորան. Ավետարանի սկզբում գետեղված եկեղեցական պատմագիր Եվսեբիոս Կեսարացու (մոտ 265-339 թթ.) թուղթը Կարալիանոսին և նրա կազմած չորս ավետարանների համաբարբառներն (համաձայնության տախտակները) իրենց խորանակերպ (կամարածև) ձևավորման համար հայ մատենագրության մեջ կոչվում են խորաններ: Զննվող ձեռագրում ամբողջությամբ պահպանվել է միայն Կարալիանոսին պատկերող խորանը, որին հաջորդող ութ խորանների մեջ համաբարբառային տասը կանոններն են: Խորանը խորհրդանշում է Ավետարանի մուտքը, և ինչպես Վանական Վարդապետի մեկնության մեջ է նշվում, խորաններն իրենց պայծառ գույներով Ավետարանում գետեղված մտավոր գանձերի նախադուռն են⁴⁴: Գլխազարդի կենտրոնում՝ կապույտ խորքի վրա, պատկերված է սևահեր և կարճ մորուքով Կարալիանոսը՝ ոսկեգոծ լուսապսակով և բաց մագաղաթի գալարը ձեռքին (էջ 2ա): Կարալիանոսի դիմանկարը գետեղված է կամարի տակ, խորանները երկայուն են, խարիսխներում պատկերված են մեկական առյուծներ: Խորանների նման կենդանակերպ նկարազարդումը բնորոշ է «Սմբատ Գունդստաբլի» Ավետարանի խորաններին, որտեղ կենդանակերպ են խոյակները⁴⁵: Ճակատազարդի վերին գույգ անկյունազուլիսներին պատկերված են բուսազարդերից կազմված եղջյուրներ, որոնց կենտրոնում՝ սկիհի շուրջ, առկա են երկու դիմահայաց սիրամարգեր: Անտիկ ժամանակաշրջանում տարածված էր այն պատկերացումը, թե սիրամարգի մարմինը չի փտում, և ելնելով դրանից՝ հեթանոսները նրան դիտում էին որպես անմահության, իսկ քրիստոնյաները՝ Քրիստոսի Հարության խորհրդանիշ: Խորանների մեկնություններում հիշյալ թռչունները բնութագրվում են իբրև «ոսկեփետուրք և ոսկետուրն»՝ ակնարկելով հրեշտակաց դասի մաքուր ու անաղարտ բնությունը⁴⁶: Հատկանշելի են խորաններից երկուսը, որոնց կենտրոնական սյունը պսակված է թագակիր մարդադեմ խոյակով, որոնք, հիմնականում պատկերում էին Դավիթ կամ Սողոմոն մարգարեներից որևէ մեկին: Խոյակի նման պատկերումը բնորոշ է ԺԳ-ԺԴ. դդ. կիլիկյան մանրանկարչությանը:

⁴⁴ Վ. Հ. Ղազարյան, Մեկնութիւն Խորանաց, Ս. Էջմիածին, 2004, էջ 31:

⁴⁵ «Սմբատ Գունդստաբլի» Ավետարանը՝ ՄՄ ձեռ. Հ^ֆ 7644, ստեղծվել է կիլիկյան մանրանկարչության զարգացման շրջանում՝ ԺԳ. դարի 60-70-ական թթ.: Ավետարանի գլխավոր հիշատակարանը չի պահպանվել, կան միայն կարճ հիշատակագրություններ՝ գրված պատվիրատու՝ գորավար, դիվանագետ ու պատմաբան Սմբատ Գունդստաբլի ձեռքով, որը եղել է նաև Կիլիկյան Հայաստանի Հեթում Ա. թագավորի եղբայրը: Բարձրաստիճան պատվիրատուի պահանջներին համապատասխան՝ ստեղծվել է այս շքեղ ձեռագիրը, ընտիր մշակված մագաղաթի վրա, մանր գեղեցիկ բոլորգրով և զարդարված մանրանկարներով՝ խորաններով, անվանաթերթերով, ավետարանիչների պատկերներով, լուսանցազարդերով, որոնք արված են բարձրորակ ներկերով, ոսկու առատ օգտագործմամբ:

⁴⁶ Վ. Հ. Ղազարյան, Խորանների մեկնություններ, Երևան, 1995, էջ 15:



Թագակիր մարդադեմ խոյակներ, էջ 5բ, 6ա

«Ձորավոր» Ավետարանի՝ Եվսեբիոսի նամակի ու համաբարբառի ութ հանդիպակաց խորաններն ունեն կառուցվածքային որոշ ընդհանրություններ. դրանք կազմված են երկու հիմնական տարրերից՝ գորգանման ուղղանկյուն գլխազարդից և սյուների մեջ ամփոփված բնագրային աղյուսակային խորաններ մակերեսից: Կառուցվածքը գլխավորապես հիմնված է պատվանդան ծառայող հորիզոնական նախշազարդ երկարավուն երիզի վրա, իսկ սյուներն ու գլխազարդը միմյանցից բաժանվում են պատվանդանի երկարությանը գրեթե հավասար հորիզոնական քիվով⁴⁷: Բոլոր խորանները եռասյուն են, սյուները՝ խարիսխ խոյակներով, ինչպես «Հաղբատի» Ավետարանի (ՄՄ ձեռ. Հ^մ 6288) խորանների դեպքում⁴⁸: Խոյակները հիմնականում կազմված են բուսական ոճավոր զարդանախշերից: Խորանների գլխազարդի ոսկե հենքը զարդարված է կապույտ, կարմիր, սև գծերի հյուսվածքով կազմված երկրաչափական և բուսական համակցություններից: Դրանց մեծ մասի վերնամասը հարդարված է քրիստոնեական հավատքը խորհրդանշող սկիհի շուրջը համաչափ դասավորված երկու թռչուններով, որոնք մերթ դիմահայաց են, մերթ՝ հակառակ դիրքով: Բացառություն է խորաններից մեկի գլխազարդը (էջ 9բ), որտեղ թռչուններին փոխարինում են առասպելական գույգ կերպարներ: Մեկ այլ գլխազարդի վերնամասի կենտրոնում պատկերված են իրար հետ կռվի պատրաստված աքաղաղներ⁴⁹ (էջ 7բ), որն ինքնատիպ է այն առումով, որ ներսում՝ կամարի մեջ, նշմրավում են մաս մարդկային երկու դեմք: Նման երևույթը բնորոշ է Մատենդարանի Հ^մ 9422 ձեռագրի անվանաթերթերի պատկերազարդմանը:

Գլխազարդերից մեկի երկու կողային լուսանցներում՝ ճակատազարդի հորիզոնական քիվի (արխիտորավի) վրա, պատկերված է վառվող մոմով մոմակալ՝ դեմ դիմաց կանգնած գույգ թռչուններով (էջ 3բ): Ինչ վերաբերում է արտաքին լուսանցների պատվանդաններին, ապա դրանք հարդարված են ոչ փարթամ կենաց ծառերով, որոնք իրենց վրա են կրում տարբեր դիրքերով պատկերված մեկական թռչուններ:

⁴⁷ Վ. Հ. Ղազարյան, Սարգիս Պիծակ, Երևան 1980, էջ 27:

⁴⁸ Հաղբատի Ավետարանը Անիի մանրանկարչության եզակի նմուշ, հեղինակ-կազմող՝ Կ. Մաթևոսյան, մասնակից հեղինակ՝ Գ. Էլիազյան, Երևան, 2012, էջ 14:

⁴⁹ Հ. Հակոբյան, Արցախ-Ուտիքի մանրանկարչությունը 13-14-րդ դդ., Երևան, 1989, էջ 39-40:



Խորանի գլխազարդ, էջ 7բ

Խորաններն ունեն հագեցած գունային երանգներ. ներկապնակն օժտված է հիմնականում չորս գույնով՝ կարմիր, կանաչ, սև և կապույտ. աչքի է ընկնում նաև ոսկու առատ օգտագործմամբ: Խորանների չորս գույները խորհրդանշում են բնության նույնքան տարրերը:

Անվանաթերթ. Խորաններից զատ՝ ճոխ ու հագեցած մանրանկարչությամբ աչքի են ընկնում նաև Ավետարանի անվանաթերթերը, որոնց հորինվածքում ներդաշնակ կերպով համադրված են երկաթագրի գեղեցկությունը, ավետարանչի խորհրդանշանների հետ հանդես եկող խոշոր սկզբնատառը և ինքնատիպ ճակատազարդը:

Անցնելով անվանաթերթերի ուսումնասիրությանը՝ անհրաժեշտ է նախ դիտարկել ճակատազարդի պատկերագրությունը: Մատթեոսի Ավետարանի անվանաթերթում ուղղանկյուն պատկերի ստորին հորիզոնական գիծը հատվում է կամարաղեղով: Յուրաքանչյուր անվանաթերթի ճակատազարդի կամարի տակ գրված է համապատասխան Ավետարանի խորագիրը, օրինակ՝ «Ավետարան Ըստ Մատթեոսի»: Դակատազարդի ուղղանկյան ներսում՝ ոսկեգույն հենքի վրա, պատկերված են բուսական զարդանախշեր և երկու հուշկապարիկ, որոնց կենտրոնում՝ մեղալիոնի մեջ, ներկայացված է «Քրիստոս Ամենակալ» պատկերագրական տիպը, որտեղ Քրիստոսը աջ ձեռքով օրհնում է, իսկ ձախում պահում է Ավետարանը: Դակատազարդի վերին անկյունագույնների վրա պատկերված են բուսազարդերից կազմված եղջյուրներ, իսկ կենտրոնում՝ խաչի շուրջը համաչափ դասավորված երկու թռչուն: Դակատազարդից ներքև պատկերված է «Գ» սկզբնատառը՝ Մատթեոսին խորհրդանշող հրեշտակի տեսքով: Ի դեպ, հրեշտակի լուսապսակը ոսկեգույն է (էջ 12ա):

Մարկոսի Ավետարանի անվանաթերթի ուղղանկյունաձև ճակատազարդը հարդարված է բուսական զարդանախշերով, որոնց կենտրոնում՝ մեղալիոնի մեջ, տեղադրված է հավասարաթև խաչ (էջ 77ա): Ինչպես խորաններում, այնպես էլ այստեղ, վերնամասում պատկերված են քրիստոնեական հավատքը խորհրդանշող սկիհի շուրջը համաչափ դասավորված երկու թռչուն:

Անվանաթերթի ճակատազարդի տակ գետեղված «Ս» սկզբնատառի երկու ստեղծերի արանքում Մարկոս ավետարանչի խորհրդանշան առյուծն է՝ Ավետա-

ընտրել էր խաչելությունից մեկ տարի առաջ և տվել այն հորդորները, ինչ տվել էր 12 առաքյալներին: Արևմտյան արվեստում չորս ավետարանիչները նույնացվել են եկեղեցական տեսության մեկնողների՝ Ամբրոսիոսի, Հերոնիմոսի, Ավգուստինոսի և Գրիգոր Մեծի հետ: Հաճախ նույնացվել են նաև մարգարեների՝ Եսայու, Երեմիայի, Դանիելի և Եզեկիելի հետ, որոնց երևացել է Քառակերպը, որի ամեն մի կերպը խորհրդանշում էր մի ավետարանչի: Այսպես, Մատթեոսը պատկերվել է մարդու կամ հրեշտակի տեսքով, Մարկոսը՝ առյուծի, Դուկասը՝ եզան, և, վերջապես, Հովհաննեսը՝ արծվի: Խորհրդանշների այս համակարգի ստեղծողներն են՝ Հերոնիմոսը (342-410 թթ.) և Եպիփան Կիպրացին (315-403 թթ.): Այս կենդանիները կոչվում են հայտնութենական (ապոկալիպտիկ) կենդանիներ և մշտապես պատկերվել են փառապատկով, ինչը վկայում է նրանց աստվածային բնույթը: Ավետարանիչներին հայտնութենական կենդանիների տեսքով պատկերելը ունի իր բացատրությունը: Մարդը երկրի տիրակալն է և համապատասխանում է Քրիստոսի մարդասիրությանը: Առյուծը վայրի կենդանիների տիրակալն է և խորհրդանշում է հպարտությունը, արքայական արժանապատվությունը և համապատասխանում է Քրիստոսի հարությանը: Ցուլը կամ եզը ընտանի կենդանիների տիրակալն է և խորհրդանշում է ուժը, զոհողությունն ու չարչարանքները, որը Քրիստոսը կրեց խաչի վրա: Արծիվը թռչունների տիրակալն է և խորհրդանշում է արժանապատվությունը, բարերարությունը և աստվածայինը, ինչը կապվում է Համբարձման հետ: Բացի այդ, Մատթեոսի՝ մարդու տեսքով պատկերվելը բացատրվում է նրանով, որ նա իր Ավետարանում հիմնականում ընդգծում է Քրիստոսի մարդկային բնույթը և վկայում Քրիստոսի հրեական ծագման իսկության մասին: Մարկոսի՝ առյուծի ձևով պատկերվելը բացատրվում է նրանով, որ նա մատնանշում է Քրիստոսի աստվածային իշխանությունը՝ ընդգծելով նրա գործերի վեհությունը: Դուկասը պատկերվում է եզան տեսքով, քանի որ նրա Ավետարանը սկսում է զոհաբերության տեսարանով, որը հոգևորականները կատարում են տաճարում. այս դեպքում շեշտվում է նաև Քրիստոսի կյանքի՝ ինքնազոհաբերության հետ ունեցած կապը: Հովհաննեսը ներկայացվում է արծվի տեսքով, ինչը խորհրդանշում է առաքյալի ունեցած հզոր և բարձր թռչող միտքը, որով նա շարադրել է իր Ավետարանը (կան և այլ բացատրություններ):

«Չորսվոր» Ավետարանում Մատթեոս ավետարանիչը պատկերված է իմաստունի դիրքով՝ իր գրելիքի մասին խորհրդածելիս, բարձր աթոռին նստած: Նրա տակ դրված է կարմիր մի բարձ: Ինքնամիտփի հայացքը արտացոլում է Քրիստոսի կյանքը նկարագրող ոգեշնչված աշակերտի ստեղծագործական հոգեվիճակը: Ծաղկողը, որի անունը ցավոք մեզ չի հասել, ավետարանչին պատկերել է կապույտ պարեգոտով (կապա, տունիկա), նարնջագույն վերնագգեստ (տոգա) և սանդալներ հագած: Նրա առջև պատկերված է փոքր, քառոտանի սեղան՝ վրան գրեմական պիտույքներ (գրիչ, քանաքաման, մկրատ և այլն): Սեղանին ամրացված է նաև բարձր, ձկնակերպ հենարանով գրակալ, ձկան բերանը հաված է սեղանի եզրին, իսկ պոչին դրված է գիրք: Չուկը քրիստոնեական խորհրդաբանության մեջ ունի երկակի իմաստ՝ կատակոնքներում իբրև Հիսուսի, ավետարաններում՝ մարդու հոգու, որպեսզի առաքյալները որսային այն, ինչպես Պետրոսը և Չեբեդեոսի որդի-

⁵¹ **Н. В. Покровский**, Евангелие в памятниках иконографии, Москва, 2001, с. 37 (այսուհետև՝ Евангелие в памятниках иконографии):

ները ուռնականով ձուկ էին որսում⁵¹: Գրականի պատվանդանի կամարածև խորշում պատկերված է սափոր: Ավետարանչի աթոռը զարդարված է տարածև նախշերով: Հայտնի է, որ նստած ավետարանիչների պատկերները միջնադարյան արվեստում ստեղծվել են բանաստեղծներ Էվրիպիդեսին, Սոփոկլեսին և փիլիսոփաներ Պլատոնին, Արիստոտելին, Ջենոնին պատկերող հելլենիստական շրջանի արձանների հիման վրա⁵²: Մանրանկարն աչքի է ընկնում կատարման գունային գեղանկարչական եղանակով, հորինվածքի կոտ ամբողջականությամբ: Ավետարանչի մեծածավալ, կոթողային կերպարը այստեղ ներկայացված է ճարտարապետական կառույցի հենքի վրա: Վերջինիս քիկունքում վեր են խոյանում գմբեթով, պատշգամբով ու կարմիր կոմիդորե տանիքով կառույցներ, որոնք պսակված են խաչով. դրանք պատկերված են ճակատային դիրքերով: Վերին աջ մասում երկնային քառորդ շրջանից իջնում է Աստծո աջը (մեկնված են ցուցամատն ու միջամատը, ծավալած՝ ճկույթն ու մատնեմատը՝ բուրի հետ): Աստծո աջը ոգեշնչման աղբյուր է ավետարանչի համար, որի պատկերը զետեղված է շրջանակի մեջ՝ նախազարդված բուսական տարրերով: Վերնամասի անկյունագլուխները հարդարված են բուսազարդերից կազմված եղջյուրներով: Մատթեոս ավետարանչի մանրանկարը որոշ ընդհանրություններ ունի «Սմբատ Սպարապետի» և «Ութ մանրանկարիչներ»⁵³ ավետարաններում զետեղված նույնանուն ավետարանչի պատկերների հետ:



Ջաքեոս, էջ 175բ

Լուսանցային մանրանկարներ և լուսանցազարդեր. Ավետարանի լուսանցներում ծաղկողը պատկերել է ավետարանական պատմության մի քանի դրվագներ և թողել զարդանախշեր, որոնք նշում են նոր գլուխների սկիզբը: Լուսանցային մանրանկարներում մարդկային կերպարներն ավարտվում են բուսական վերջավորություններով: Ծաղկողը լուսանցում միայն մեկ թեմա է արծարծում, ընդ որում՝ թեմային վերաբերող բնագիրը մեծ մասամբ հենց պատկերի կողքին է, որով բնագիրն ու պատկերը լրացնում են միմյանց⁵⁴: Լուսանցային մանրանկարների մեծ մասը գծային պատկերներ են՝ արված կարմիր թանաքով: Բացառություն են միայն Հովհաննես Մկրտչին պատկերող մանրանկարը և մի քանի բուսական լուսանցազարդեր ու զարդազրդեր (էջ 15բ, 17ա և այլն):

«Մուտք Երուսաղեմ» տերմինական մանրանկարից լուսանցում ներկայացված է միայն կարճահասակ Ջաքեոսին պատկերող հատվածը (էջ 175բ): Այն ժամանակ, երբ Քրիստոսը էշին նստած մտնում է Երուսաղեմ, բնակիչները արմավենու ճյուղեր են սփռում Տիրոջ ճանապարհին: Ըստ Մատթեոսի և Մարկոսի՝ արմավենու ոստեր կտրատելու համար բնակիչներից ոմանք ծառ են բարձրանում: Համաձայն Ղուկասի՝ ծառ է բարձ-

⁵² Գրիգոր Ծաղկող, էջ 33

⁵³ ՄՄ Հ^{մբ} 7651 «Ավետարան» ձեռագիրը պատկերազարդել են ԺԳ. դարի վերջին քառորդի անհայտ նկարիչներ, իսկ 1320-ին՝ Սարգիս Պիծակը:

⁵⁴ Վ. Հ. Ղազարյան, Սարգիս Պիծակ, էջ 75-76:

րանում նաև Ջաքետո կարճահասակը՝ Քրիստոսին տեսնելու նպատակով: Նրան, սովորաբար, պատկերում են նման տեսարանում, որպեսզի ցույց տան, թե որքան շատ մարդ էր հավաքվել, որ կարճահասակ Ջաքետոն բարձրանում է ծառը՝ Քրիստոսին տեսնելու համար⁵⁵: Լուսանցային մանրանկարում Ջաքետոն ներկայացված է հենց վերը նշված պատկերագրական տիպով՝ արմավենու ուստը ձեռքին:

Ձեռագրի 122բ և 123ա հանդիպակաց էջերի լուսանցներում զետեղված է Ավետումը: Չախ՝ 122բ էջի լուսանցում պատկերված է Գաբրիել հրեշտակապետը, իսկ հանդիպակաց 123ա էջին՝ Տիրամայրը: Հրեշտակապետի աջը պարզած է առաջ՝ որպես խոսքի և օրհնության նշան: Մարիամն ունկնդրում է հրեշտակապետին՝ ձեռքերը վեր պարզած, հայացքը խոնարհված է, կարծես հնազանդության նշան է ցույց տալիս: Աստվածամոր դիրքը և շարժումը փաստում է, որ նա խոնարհությամբ է ընկալում Գաբրիելի խոսքերը:

Ավետարանի 16բ և 17ա էջերի լուսանցները ներկայացնում են Հովհաննես Սկրտչին, որը պատկերված է մորուքով, երկար մազերով, լուսապսակով, պարեգոտով, ձեռքին՝ գալարակ: Այս մանրանկարը տարբերվում է մյուսներից նրանով, որ նկարագրողված է կանաչ և կապույտ գույներով: Մյուս լուսանցային պատկերը ներկայացնում է գլխատված Հովհաննես Սկրտչին: Լուսանցագրողի վերին հատվածը կատարում է սկուտեղի դեր, որի վրա դրված է Հովհաննեսի գլուխը⁵⁶: Վերջին լուսանցային մանրանկարը, որը մույնպես զետեղված է հանդիպադիր էջերում, պատկերում է Պողոս և Պետրոս առաքյալներին (էջ 240ա-241բ):

Ինչ վերբերում է լուսանցագրողներին, ապա դրանք հիմնականում կազմված են երկրաչափական և բուսական ռճավորված զարդանախշերից (էջ 16ա, 22ա, 91ա և այլն), երբեմն էլ արտահայտված են թռչունների (էջ 33ա, 111բ և այլն), տաճարի (էջ 61բ, 126բ և այլն), ծառի (էջ 53բ, 54բ և այլն) կամ խաչի (էջ 73ա, 197ա) տեսքով: Առանձնանշելի են հատկապես ավետարանիչների անվանաթերթերի լուսանցագրողները, որոնք պսակված են խաչով և ունեն շքեղ նկարագրություն (էջ 77ա, 121ա):

Չարդագրեր. Ավետարանի գրադաշտն աչքի է ընկնում նաև բազմաթիվ զարդագրերով, որոնք հիմնականում հանգուցագրեր ու թռչնագրեր են, երբեմն էլ առանձին սկզբնատառեր մարդադեմ են: Չարդագրերի գրեթե կեսից ավելին «Ե» գլխագրի՝ հիմնականում թռչնակերպ տեսակներն են (էջ 13բ, 14ա և այլն): Նախքան դրանց քննությանն անցնելը՝ անհրաժեշտ է նկատել, որ գրերը ձևավորելու առաջին փորձերը հայկական ձեռագրերում ի հայտ են գալիս դեռևս Ժ. դարից⁵⁷: ԺԱ. դ. վերջերից զարդագրեր հանդիպում են ոչ միայն հայկական մատյանների անվանաթերթերում, այլև ավետարանական բնագրի գլուխների սկզբում: Ս. Տեր-Ներսիսյանը զարդագրերի արվեստում հստակորեն սահմանազատում է երկու ուղղություն, որոնցից մեկը

⁵⁵ Евангелие в памятниках иконографии, с. 347-351.

⁵⁶ Գալիլիայի կառավարիչ Հերովդես Ագրիպասի ծննդյան տոնի առթիվ Հերովդիադայի դուստր Սալոմեն (որի անունը չի հիշատակվում Ավետարանում) պարել է: Հերովդեսն այնքան է հավանել նրա պարը, որ բազմաթիվ հյուրերի ներկայությամբ խոստացել է Սալոմենին տալ այն, ինչ կցանկանա: Մոր թելադրանքով Սալոմեն խնդրել է Հովհաննես Սկրտչի գլուխը: Խնդրանքը կատարվել է, և Հովհաննես Սկրտչի գլուխը սկուտեղով մատուցվել է Սալոմենին, որն էլ այն տվել է մորը (Մտք. ԺԴ. 6-12, Մրկ. Զ. 21-29):

⁵⁷ Չարդագրության մասին մանրամասն տե՛ս Հայկական մանրանկարչություն. զարդատառեր, Երևան, 1992:

բնորոշ է կիլիկյան, իսկ մյուսը՝ Բարձր Հայքի մանրանկարչությանը: Բարձր Հայքի մանրանկարիչները գերադասում են տառերը ձևավորել երկրաչափական ու բուսական տարրերով, օրինակ՝ եռանկյունների շարքերով, օղակներով և դրանց արանքը գետեղված հյուսվածքներով ու փոքրիկ արմավենիկներով: ԺԲ. դարի վերջից կիլիկյան գրքարվեստում գրերը սկսում են զարդարել թռչուններով, իսկ ԺԳ. դարից՝ մարդկային կերպարանքներով:

Մանրանկարչության ընդհանուր բնութագիր. «Չորավոր» Ավետարանի ծաղկողը նախապատվությունը տալիս է և՛ Բարձր Հայքի, և՛ կիլիկյան մանրանկարչության ավանդույթներին: Ավետարանի զարդագրերի ստեղծները, կամ, այլ կերպ ասած՝ «կայները», գլխավորապես զարդարվում են եռանկյունների, քառանկյունների շարքերով, որոնց արանքում տեղադրվում են եռատերևներ, քառատերևներ, բողբոջներ (էջ 53բ, 56ա և այլն): Բարդ հանգույցներից բաղկացած որոշ զարդագրեր աչքի են ընկնում արտակարգ գեղակազմ ձևերով:

Անվիճելի է, որ խորաններն ու գլխազարդերը, ավետարանիչների խորհրդանիշները պատկերող սկզբնատառերի, զարդագրերի, լուսանցազարդերի, լուսանցային մանրանկարների հետ միասին էջի վրա դասավորված են արտակարգ հմտությամբ: Ներդաշնակված կանաչ, կարմիր, կապույտ գույները ոսկե հենքի վրա ստեղծում են ակնահաճո գունային ներկայնակ և հատուկ փայլ հաղորդում ձեռագրին:

«Չորավոր» Ավետարանի մանրանկարչական արվեստը քննող մեր համառոտ տեսությունը վկայում է, որ ձեռագրի նկարազարդումներն արվել են ոչ թե մեկ, այլ, թերևս, երկու տարբեր ծաղկողների կողմից: Առաջինը հեղինակն է խորանների, ավետարանիչների պատկերների, անվանաթերթերի, որոշ լուսանցազարդերի, իսկ երկրորդը՝ լուսանցազարդերի մեծ մասի, լուսանցային մանրանկարների և զարդագրերի, որոնք տարբերվում են իրենց կատարողական վարպետությամբ, պատկերման ու գունավորման ոճով:

Ինչպես վերը նշեցինք, Ա. Մաթևոսյանը, նկատի առնելով «Չորավոր» Ավետարանի՝ «Սմբատ Գունդատաբլի» Ավետարանի հետ ունեցած գրչական ու մանրանկարչական բազում ընդհանրությունները, եկել էր այն եզրահանգման, որ ձեռագիրը կրում է կիլիկյան մանրանկարչական դպրոցի դրոշմը⁵⁸: Կարծում ենք՝ այդ նմանությունները առաջին հերթին երևան են գալիս խորանների՝ մի դեպքում խարիսխների, մյուս դեպքում՝ խոյակների կենդանակերպ լուծումներով, անվանաթերթերի ճակատազարդերի ներսում կենդանիների նույնատիպ պատկերներով, ավետարանչի հագուստի ծալքերի գրեթե նույնակերպ արտահայտմամբ, ճարտարապետական հենքով, ինչպես և զարդապատկերների կատարման համանման եղանակով, որոնք թույլ են տալիս հավանական համարել, որ մանրանկարները կարող են պատկանել միևնույն մանրանկարչական դպրոցին:

Արփինե Միմոնյան

Մատենադարանի ձեռագրագիտության
և Մայր ցուցակի բաժնի գլխավոր

⁵⁸ Ա. Մաթևոսյան, Երևանի գրչության կենտրոնները, էջ 114-115:

Ձ. Ձեռագրի նկարագրությունը: Նպատակահարմար ենք գտնում կից ներկայացնել նաև ձեռագրի գիտական ընդարձակ նկարագրությունը: Հիշատակարանները, բնագրային տեսքից բացի, բերել ենք նաև աշխարհաբար տարբերակներով:


4060

ԱՎԵՏԱՐԱՆ

ԺԳ. դար

ՍՏԱՅՈՂ՝ Յակոբ Երեւանցի: ԿԱԶՄՈՂ՝ Զաքարյայ երեց:

ԹԵՐԹ՝ 245. չգրված՝ 1ա, 2բ-3ա, 4բ-5ա, 6բ-7ա, 8բ-9ա, 10բ-1ա, 245աբ: ՊՐԱԿ՝ 10+[Ա-Ի]x12+6 (Ա, Է, ԺԱ՝ 11, Ձ՝ 7, Թ՝ 13, Ժ՝ 8) (խառն պրակակալմամբ): ՆՅՈՒԹ՝ մագաղաթ, ք. 243-4՝ թուղթ: ՄԵԾՈՒԹՅՈՒՆ՝ 23,7x16,2: ԳՐՈՒԹՅՈՒՆ՝ երկսյուն (17x12), ԳԻՐ՝ բոլորգիր (մմուշ՝ 17ա): Տող՝ 23: ԿԱԶՄ՝ մուգ շագանակագույն դրոշմազարդ կաշի, դռնակով, Ա. փեղկը՝ պատված 59 մեծ եւ 32 փոքր կոստղերով ու 6 փլաքներով (կոստղերից 14-ն ընկած), մեջտեղում մետաղյա խաչ՝ մակագրությամբ. «Յիշատակ է Սուրբ խաչս Առաքելին եւ կողակցին՝ Ուղուրսօթանին եւ դստերացն՝ Սէվարխանին, Օղլանփաշին, Մարիամին», միջուկը՝ տախտակ, աստառը՝ կարմիր մետաքս:



էջ 17ա

ՄԱՆՐԱՆԿԱՐԶՈՒԹՅՈՒՆ՝ Մատթեոս. մակագրությամբ «Սուրբ Մատթեոս աւետարանիչ»՝ 11բ (մնացած երեք ավետարանիչների մանրանկարները՝ կտրած-հանած): Լուսանցային մանրանկար՝ Հովհաննես Մկրտիչ՝ 15բ, 39բ, Գաբրիել հրեշտակապետ՝ 48ա, Ավետում՝ 122բ-123ա (հանդիպակաց էջերում՝ Գաբրիել հրեշտակապետ և Տիրամայր), Զաքեոս՝ 175բ, Հիսուս Քրիստոս՝ 199բ, Պողոս և Պետրոս առաքյալներ՝ 240բ-241ա: Խորան՝ 1ա-2ա (2ա՝ գլխազարդում՝ Կարպիանոսի դիմանկարը), 3բ-4ա, 5բ-6ա, 7բ-8ա, 9բ-10ա (4ա, 6ա, 10ա՝ գլխազարդը՝ մկրատված): Կիսախորան՝ 12ա (կենտրոնում՝ Հիսուս Քրիստոսը), 77ա, 121ա, 192ա: Լուսանցազարդ՝ բուսական, թռչնային, ծառ, տաճար՝ 109ա, 126բ, 179բ, 216բ, խաչ՝ 73ա, 147ա: Զարդագիր՝ հրեշտակագիր՝ 12ա, թռչնագիր, հանգուցագիր, մարդադեմ «Ձ»՝ 48ա, 193ա: Գույներ՝ ոսկի, կարմիր, կապույտ, կանաչ, դեղին, մանուշակագույն, մոխրագույն, շագանակագույն, ծիրանի, սպիտակ, սև:

ՎԻՃԱԿ՝ բավարար, խոնավության հետքերով, գործածությունից մի շարք թերթեր գունափոխված, կազմի կաշվի եզրերը մաշված, երեք կապիչները, ինչպես նաև խաչի կենտրոնի ու վերին թևի ակերն ընկած, մեջքին առկա են նախորդ պիտակից մնացած հետքեր, աստառը՝ ցեցակեր, թ. 1, 4, 6, 10՝ վերևից կիսով չափ մկրատված՝ մանրանկարները վնասված, տերունական չորս մանրանկարներից երեքը հիմքից կտրած-հանած, հետագա նորոգման ժամանակ օգտագործված են նաև այլ ձեռագիր պատառիկներ, թ. 24՝ մագաղաթի ճեղքը կարված քուղով, իսկ թ.՝ 55, 140, 169, 223, 230՝ մնացել են միայն կարի անցքերը, թ. 38, 85, 159, 237՝ լուսանցին առկա են էջանշան թելեր:

ԲՈՎԱՆԴԱԿՈՒԹՅՈՒՆ

1. 1բ-2ա Թուրք Եսեբեայ
2. 3բ-4ա, 5բ-6ա, 7բ-8ա, 9բ-10ա Համաբարբառ (նաև՝ լուսանցային)
3. 12ա-76բ Աւետարան ըստ Մատթեոսի
4. 77ա-120բ Աւետարան ըստ Մարկոսի (120աբ՝ «Յարուցեալ Յիսուս»)
5. 121ա-91բ Աւետարան ըստ Դուկասու
6. 192ա-241բ Աւետարան Յովհաննու
- 242աբ ՀԱՎԵԼԱԳՐՈՒԹՅՈՒՆ (ԺԸ. դար, շղագրանման նոտրգիր) Այս է խրատք պաշտմանց Աւետարանից – Մատթեոս ճեմ. ...

ՀԻՇԱՏԱԿԱՐԱՆՆԵՐ

1. 243-4բ (ԺԵ. դար, բոլորգիր, ստացողի) Յուսով անմահին Աստուծոյ Հայր եւ ի փառս ծնիցելոյն /// անեղապէս Որդ[ոյ]ն միածնի եւ ի գովեստ բխե[ցել]ոյն ի նոյն յԵութենէ Հոգւոյն ճշմարտի, համազար համապատու, համագոյ եւ միասնական Սուրբ Երրորդութեանն Հայր եւ Որդոյ եւ Հոգւոյն Սրբոյ:

Արդ, ես՝ անա[ր]ժանս եւ անպիտանս ի յոքունց եւ ի նմանեաց իմոց **Յակովբ** կոչեցեալ՝ որդի **Վիշապին**, գեղաքաղաքէս **Էրեւանոյ**, ի յաւանդութենէ ծնողաց իմոց վեր[ա]խացեալ ընկալմամբ զքրիստոսական դաւանութիւնն, հաւատակցութեամբ դաւանութեանն Երրորդական աստուածութեանն, եւ զմտաւ ածեալ իմ յիշեցի զառաքելական հրամանս, որ ասէ. Երանի, որ [ո]ւ[ն]իցի զաւակ ի Սի[ո]ն եւ ընդանի յԵրուսաղէմ: Եւ սակս այս պատճառի ար ըստ արեւ ըղձայի մնալ, հասանիլ բաղձանաց սրտիս: Որոյ ողորմածն եւ բարեգութն Աստուած, /// [ար]արիչն է խնդրու[ածոցն], լսալոյն է աղաթից, ընդունելի արար զաղաչանս մեր եւ բերեալ հանդիպեցոյց պատահմամբ ի դրունս մեր զաստուածախաւս ըզքրիստոսայարաք սուրբ Աւետարանս, ի ձեռն վաճառողաց անգին մարգարտիս, որոյ ականատես եղեալ իմ աչօք՝ յարեա, կանգնեցա, կացի եւ կառուցա, ցնծացա եւ զուարճացա, բերկրեցա եւ բոլորեցա, եւ յոյժ գոհացա զամենառատ պարգետողէն, ո[ր] արժանի արար կատարել զխնդրուածս իմ եւ հաճոյացոյց զբաղձանս իմ: Վասն որոյ եւ /// կամաք Արարչին [243բ] [ս]տացայ զհոգեփրկանք սուրբ Աւետարանս ի հալալ արդեանց իմոց՝ յիշատակ ինձ եւ ծնողաց ի[մ]ոց եւ ամենայն արեան մերձաւորաց, առ ի Քրիստոս ննջեցեալ հաւրն իմոյ՝ **Ուշապին** եւ մար իմոյ՝ **Ջանանին** եւ

կենակցին իմոյ՝ **Մամախաթունին**, եւ ի Քրիստոս փոխեցեալ եղբարց իմոց՝ **Գրիգորին** եւ **Անտիպէկին**, եւ որդւոյ իմոյ՝ **Դըտրշի**: Եւ վասն արեւշատութեան մնացեալ որդոց իմոց՝ **Աղուշին** եւ **Ջահանշին**, եւ որդոյ իւրոյ՝ **Դովլաթխաւջին** եւ զաւակաց նորին՝ **[Ս]մբատին** եւ **Ջաքարին**: Նաեւ ծերացեալ զոքանչին իմո **Էսուզանին**, որ աւգնական եղեւ ի գին սուրբ Աւետարանիս: Եւ արդ, ես՝ **Յակոբս**, զաստուածախաւս սուրբ Աւետարանս եւ մէկ ձեռն սգեստ եւ սկիի արծաթի, որ ստացաւ ի հալալ արդեանց իմոց, ընծայեցի **Էրեւանո** հրաշալի եւ յորդոր ժամատեղեացս, որ յամենայն ամի Յայտնութեանն եւ Չատկին եւ Հոգւոյ գալըստեանն պատարագաւ եւ Քրիստոս Որդի ասելով յիշատակեն զմեզ եւ զվերասացեալ ծնողքն մեր եւ զայլ արեան մերձաւորս, որք կան շարագրեալ յիշատակարանիս:

Եւ արդ, աղաչեմ զձեզ, ո՛վ սուրբ պատարագողք եւ ընթերցողք քրիստոսապրակ սուրբ Աւետարանիս, յիշեսցիք լիաբերան բոլորով սրտիւ ի մաքրափայլ յաղաթս ձեր զիս՝ զմեղաւոր եւ զանաթման ոգի **Յակոբս** եւ զհայրն իմ՝ **զՎիշապն** եւ զմայրն իմ՝ **զՋրհանն** եւ զկողակիցն իմ՝ **զՄամախաթունն**, եւ զոքանչն [244ա] **[Է]սուկանն** եւ /// ազատ եղբարքն իմ՝ **զԳրիգորն** եւ **զԱնտիպէկն** եւ զորդիքն [ի]մ՝ **զԴտրշահն**, փոխեցեալն առ Քրիստոս եւ զնորաբողբոջ դեռաբոյս որդիքս իմ՝ **զԱղուշէն**, եւ **զԴովլաթխաւջէն**, եւ **Սմբատն**, եւ **Ջաքարէն**, **զՋահանշէն** եւ զայլ ամենայն ազգայինս իմ. զառաջինս, զմիջինս եւ զվերջինս: Որով յիշողքս յիշեալ լիջիք ի Քրիստոսէ Աստուծոյ մերոյ՝ արիւնեւոյ յաւիտեանս. ամէն:

Յաստուածարար սքանչելեաց Տեառն բազում ինչ է, զոր տեսանեմք աչաւք եւ իմանալ անկարանամք մտաւք, եւ բազում ինչ է, զոր իմանամք մտաւք եւ չափն պատմել անգիտանամք բանի: Զի ահա, տեսանեմք զարեգակն, զի գեղեցիկ է եւ հրաշալի, եւ զորայիտութիւն գեղոյն իմանալ կարանաւմք մտաւք: Եւ դարձեալ՝ զծով իմանամք, թէ մեծ է եւ անբաւ, բայց զչափ երկայնութեան եւ զլայնութեան եւ զխորութեան, պատմել անգիտանամք բանի: Այսպէս եւ զուր որդւորութեանցն եւ խնամքն Աստուծոյ անթիւ, անպատում եւ անչափ են առ ամենայն ազգս մարդկան եւ զամենեւեան ըստ իւրաքանչիւր յաւթարութեան յորդորեալ յառաջացուցանէ ի բարիս եւ զպարգեւս ողորմութեան իւրոյ բաժանէ առատապէս յամենեւեան եւ կամի, զի ամենեւեան ի գիտութիւն, ճշմարտութիւն եկեցեան: Ըստ որում եղբայր **Յակոբ** ի **յԷրեւան** գեղաքաղաքէ, ի մանկական տիոց հետէ փութացեալ միշտ ի բարիս եւ յարդիւնս /// [244բ] /// վերըստին ստացաւ [ի] /// [հալալ] ընչից իւրոց զաստուած[ախաւս] սուրբ Աւետարանս եւ [ս]կիի արծաթի եւ ձեռն մի ս[գես]տ: Ի դառն եւ ի նուրբ ժամանա[կիս], ի բռնակալութեան բազում աշխարհաց եւ Տանս Արեւելեան Հայոց եւ Պարսկաց, աստուածասաստ **Թէմուր Լանկին** եւ որդոյ նորին **Միրզայ Միրանշին**, որ յարեւելից կուտէ՝ ի **Սմըղղան** քաղաքէ, բազում եւ անթիւ հեծելօք, վասն մեղաց մեր պատուհաս սպառնացաւ յԱստուծոյ եւ ազգի մոգութեամբ խաւար գործեաց բազում աշխարհաց եւ Տանս Հայոց, զոր ոչ կարեմք զամենայն արկանել ըն[դ] գրով:

Այլ քաջահաւատ այրս այս **Յակոբ** յայս նեղ ի նուրբ ժամանակի ստացաւ զհոգէփրկանք ընծայքս եւ ընծաեաց ի դուռն սրբոյ **Երկուերեսնիս**՝ յիշատակ իւր եւ ամենայն ազգայնոց իւր: Եւ մեր տեսեալ զքաջ հաւատս սորա եւ զբարեգործութիւնս ընդ ամենեւեան առ քահանայս եւ յեկեղեց[իւն] եւ աղք[ա]տս եւ ի կարօտեալս եւ առ ամենայն որ: [Վասն որոյ] եւ /// (մի քանի տառ մնացած

փակցուած թղթի տակ) ստ[ի]պեալ յ[ամ]///ցին զմեզ գրել զին/// եւ զիրսն: Որպէս յիբ /// ստացուածիս, զի [ամ]ենեցուն տեսեալ զայ[ս] յորդորեցին ի բարի: Եւ արդ, արիւնութիւն ամենակալին Աստուծոյ, եկեսցէ, հանկիցէ ի վերայ նոր[ա] եւ ի ծնընդոց նորա, եւ զգաղն ողորմութեան [ցօ]ղեսցէ յոսկերս ննջ[ե]ցելոց նորա, եւ զրեսց[է] զանուանս նոցա ի դ[ա]լորութիւն կենաց եւ արիւնեսցէ այն արիւնութեամբն, որ ոչ անցանէ աստ եւ ի հանդերձեալն. ամէն:

244բ (ԺԵ. դար, բոլորգիր) Ձտէր *Մանուիէլ*՝ համբալ վերջին
Յաջորդ *Քրջնոյ* ու *Այրարաղին*,
Որ ծրրեցի ծայրօք մատին,
Զյիշատակաց գիծս վերջին,
Միշտ յիշեսցիք առ ի բարին,
Զմեզ եւ զմախանիքն մեր բնաւին,
Եւ զձեզ յիշէ Տէր ի բարին
Աստ եւ ի յօրն ապագա[յ]ին. ամէն:

2. 243ա (ԺԵ. դար, բոլորգիր, կազմողի) [Փ]առք Հօրն երկնաւորին, Որդոյն միածնի, Հոգոյն կենարարի. ամէն:

Արդ, եւ ես՝ յետնեալ եւ զառածեալ *Ներսէս* անուն, որ եմ *Մոզաց*, ի բնիկ գեղջէն *Սուրայ*, ի տիս տղա[յ]ութեան իմոյ ելեալ յերկրէ իմէ, հասի ի մայրայքադաքն *Երևան* եւ բնակեցա ի Սուրբ եկեղեցին, որ է մականուն *Երկուերեսին* եւ եղէ սպասաւոր եւ յաւելածու ի տանս Աստուծոյ: Ժամանակ ինչ ժամահար եղէ եւ տեսի զօրութիւն սուրբ Աւետարանիս, որ բազմաց ականատես իսկ եմ եղեալ բժշկութիւն սորա, որ կոչի *Վիշապ[յ]կենց* Աւետարան: Վաղուց ժամանակաց էր սա քայքայեալ եւ խաղիստե[ա]լ էր: Եւ ես՝ նուաստ *Ներսէս*, ետու հալալ վաստ[ակ]ոց իմոյ վերքստին նորոգել եւ կազմել յիշատակ հոգոյ իմոյ եւ ծնօղաց իմոց, եւ որ ընթեռնու, յիշէ ի սուրբ յաղօթս իւր եւ ինքն յիշեալ լին[ի] ի Քրիստոսէ Աստուծոյ մերմէ:

Սուտանուն *Չաքարայ* էրէց կազմօղ, ծառա[յ] ձեր:

Հմմտ. ԺԵ. դ. հիշ., հ. Ա., էջ 49-51:

ՆՇՈՒՄՆԵՐ՝ 1ա՝ «9, 1/4060, առաք. գ.» (սև թանաքով), «ԺԵ. դ.» (սև մատիտով):

ՀԻՇԱՏԱԿԱՐԱՆՆԵՐԻ ԱՇԽԱՐՀԱԲԱՐ ՏԱՐԲԵՐԱԿԸ

1. 243-4բ (ԺԵ. դար, բոլորգիր, ստացողի) Անմահ Հայր Աստծո հույսով և ի փառս Ծնողի /// միածին Որդու և ճշմարիտ Հոգու նույն աստվածությունից բխած գովեստի, համազոր, համապատիվ, միևնույն ու միասնական Սուրբ Երրորդութեանը՝ Հորը, Որդուն և Սուրբ Հոգուն:

Այժմ ես՝ շատերից և իմ նմաններից անպիտան և անարժան *Վիշապի* որդի *Հակոբս*, *Երևան* գյուղաքաղաքից, քրիստոնեությունն իմ ծնողներից ավանդաբար նախապէս ընդունած, հավատով դեպի Սուրբ Երրորդության դավանությունը, մտքով հիշեցի առաքելական հրամանը, որն ասում է. «Երանի [նրան], որ կունենա

զավակ Սիոնում եւ ընտանիք յԵրուսաղէմում»։ Եվ այս պատճառով օր օրի ցանկանում էի մնալ, հասնել սրտիս բաղձանքին։ Ողորմած և բարեգութ Աստված, /// խնդրողների արարիչն է, լսողը՝ աղոթքների, ընդունելի համարեց մեր աղաչանքը և աստվածախոս քրիստոսատետր Սուրբ Ավետարանս՝ իբրև անգին մարգարիտ, պատահաբար հանդիպեցրեց վաճառողների ձեռքում՝ դռան մոտ, որի ականատեսն եմ եղել իմ աչքով. կապվեցի, կանգնած մնացի, ցնծացի ու զվարճացա, ուրախացա ու ամբողջացա և խիստ գոհացա ամենառատ պարգևողից, որ արժանի համարեց կատարել իմ խնդրանքը և հաճո դարձրեց իմ բաղձանքը։ Որի համար և /// Արարչի կամքով [243բ] իմ հալալ վաստակով ստացա հոգու փրկություն Սուրբ Ավետարանս՝ իմ, ծնողներիս, բոլոր մերձավորներիս հիշատակին, ի Քրիստոս ննջեցյալ իմ հորը՝ **Ուշապին**, իմ մորը՝ **Ջանանին**, և իմ կենակցին՝ **Մամախաթունին**, և ի Քրիստոս ննջեցյալ իմ եղբայրներին՝ **Գրիգորին** և **Անտիպեկին**, և իմ որդի **Ղարշահին**։ Եվ արևշատության համար իմ մնացյալ որդիներ **Աղուպշահին** և **Ջահանշահին**, և իր որդի **Դովլաթխոջին** և նրա զավակներին՝ **Սմբատին** և **Ջաքարին**։ Նաև իմ ծեր գոքանչ **Էսուզանին**, որ օգնական եղավ Սուրբ Ավետարանը գնելիս։ Եվ այժմ ես՝ **Հակոբս**, աստվածախոս Սուրբ Ավետարանս, և մեկ ձեռք զգեստ և արծաթյա սկիւի, որ ստացա իմ հալալ վաստակով, ընծայեցի **Երևանի** հրաշալի և հոժար ժամատեղիին, որ յուրաքանչյուր տարվա Հայտնությանը, Ջատկին և Հոգեգալստյանը պատարագ և Քրիստոս Որդի ասելով հիշատակեն մեզ և մեր վերոհիշյալ ծնողներին և բոլոր մերձավոր արյունակիցներին, որոնք նշված են հիշատակարանում։

Եվ այժմ աղաչում եմ Ձեզ, ո՛վ սուրբ պատարագիչներ և ընթերցողներ քրիստոսատետր Սուրբ Ավետարանիս, Ձեր մաքրափայլ աղոթքներում ամբողջ սրտով լիաբերան հիշեցեք ինձ՝ մեղավոր և անարժան ոգի **Հակոբիս**, և իմ հայր **Վիշապին**, և իմ մայր **Ջահանին**, և իմ կողակից **Մամախաթունին**, և գոքանչն՝ [244ա] **Էսուզանին**, և /// ազատ իմ եղբայրներին՝ **Գրիգորին** և **Անտիպեկին**, և իմ որդիներ **Ղարշահին**՝ առ Քրիստոս ննջեցյալ և իմ նորաբողբոջ դեռաբույս որդիներ՝ **Աղուպշահին** և **Դովլաթխոջին**, և **Սմբատին**, և **Ջաքարին**, **Ջահանշահին** և իմ բոլոր ազգակիցներին՝ առաջինիս, միջինիս, վերջինիս։ Որով և հիշողներդ հիշված լինեք մեր Քրիստոս Աստծուց, հավիտյանս օրինված. ամեն։

Տիրոջ աստվածային սքանչելիքները բազում են, որ տեսնում ենք աչքով և չենք կարողանում իմանալ մտքով և նաև բազում է այն, որ իմանում ենք մտքով, բայց անգիտանում ենք պատմել խոսքով։ Ահա, տեսնում ենք արեգակը, որը գեղեցիկ է և հրաշալի, և գեղեցկության որպիսությունը կարողանում ենք իմանալ մտքով։ Եվ դարձյալ՝ ծովը, որ գիտենք մեծ է ու անբավ, սակայն երկարության, լայնության և խորության չափը խոսքով պատմել չենք կարողանում։ Այսպես և անթիվ է Աստծո ողորմության գութն ու խնամքը, անպատում ու անչափ են մարդկության բոլոր ազգերի հանդեպ, և բոլորին հորդորում է հոժարությամբ հասնել բարուն և իր ողորմության պարգևը առատապես բաժանում է ամենքին ու կամենում, քանի որ բոլորն էլ գալիս են գիտությունից ու ճշմարտությունից։ Ըստ այդմ **Հակոբ** եղբայրը՝ **Երևան** գյուղաքաղաքից, մանուկ հասակից ջանացել է միշտ ի բարին և վաստակով /// [244բ] /// իրենց հալալ ունեցվածքից վերստին ստացավ Սուրբ Ավետարանս, և արծաթյա մի սկիւի և մեկ ձեռք զգեստ։ Դառն ու նուրբ ժամանակներում, Հայոց Արևելից Տան ու Պարսից և ողջ աշխարհով մեկ տարածված աստվածասաստ

Լենկ-Թեմուրի բռնակալության օրոք և նրա որդի **Միրզա Միրանաշահի**, որն արևելյան կողմից էր՝ **Մամարդանդ** քաղաքից, բազում և անթիվ հեծելազորով մեր մեղքերի համար Աստված պատուհասով սպառնաց և ազգի մոգությամբ խավար գործեց ամբողջ աշխարհում ու Հայոց Տանը, որ չենք կարող այդ ամենը ներկայացնել գրով:

Քաջահավատ այս **Հակոբ** այրը, այս նեղ ու նուրբ ժամանակներում ստացավ հոգու փրկության ընծաներն ու նվիրեց **Սուրբ Երկուերեսնիս**՝ իր և իր բոլոր ազգակիցների հիշատակին: Եվ մենք տեսանք սրա քաջ հավատն ու բերեգործությունը՝ հանդեպ բոլորի, քահանաների, եկեղեցու, աղքատի, կարոտյալի եւ ամեն մեկի: Որի համար և /// ստիպված մեզ գրել /// և իրեն: Որպես /// ստացվածիս, քանի որ ամենքը այս տեսան ու խրատեցին ի բարին: Եվ այժմ, ամենակալ Աստծո ողորմությունը թող լինի նրա ու իր ծնողների վրա, ողորմության ցողը ցողեցնի նրա ննջեցյալների ոսկորները. և գրվեց նրանց անունից կենաց գրություն և օրհնվեց այն օրհնությամբ, որ չի անցնի այստեղ և հանդերձյալում. ամեն:

244բ (ԺԵ. դար, բոլորգիր) Տեր **Մանուել**, աշակերտ վերջին
Առաջնորդ **Բջնիի** ու **Այրարատի**,
Որ գծեցի մատի ծայրով
Հիշատակների վերջին գիծը
Միշտ հիշեցեք առ ի բարին
Մեզ և մեր բոլոր նախնիներից
Եվ Տերը Ձեզ հիշի ի բարին
Այստեղ և ապագայում. ամեն:

2. 243ա (ԺԵ. դար, բոլորգիր, կազմողի) Փառք երկնավոր Հորը, միածին Որդուն, կենարար Հոգուն. ամեն:

Այժմ և ես՝ հետին և մոլորյալ **Ներսես** անուն, որ բնիկ **Մոկսի Սուրայ** գյուղից եմ, երիտասարդ հասակում դուրս եկա իմ երկրից ու հասա մայրաքաղաք **Երևան** ու բնակվեցի սուրբ եկեղեցում, որ մականվամբ կոչվում էր **Երկուերեսի**, և եղա Աստծո տան սպասավոր: Որոշ ժամանակ իբրև կոչնակ եղա և տեսա սուրբ Ավետարանի գորությունը, որ բազում ականատեսներ են եղել սրա բժշկությանը, որ կոչվում է **«Վիշապկենց»** Ավետարան: Հնությունից սա քայքայվել ու խախտվել էր: Եվ ես՝ նվաստ **Ներսես**, իմ հալալ միջոցներով տվեցի այն վերստին նորոգել ու կազմել՝ ինձ ու իմ ծնողների հոգու հիշատակին, և ով կարդա՝ հիշի՝ սուրբ աղոթքը իր, և ինքը հիշված լինի մեր Քրիստոս Աստծուց:

Կազմող սուտանուն **Չաքարիա** երեց, ձեր ծառա:

ЕВАНГЕЛИЕ «ЗОРАВОР» (Всемогущий)

Резюме

Евангелие № 4060 из собрания Матенадарана им. М. Маштоца, известное также под названием «Зоравор», было написано и иллюстрировано, по видимому, в XIII-XIV вв. в Киликии. Примерно в конце XIV в. рукопись была перевезена в Ереван, где её приобрел сын Ереванци Вишапа, Акоп, и передал в дар церкви Еркуересни. Об этом свидетельствуют памятные записи получателя и переплетчика (реставратора), помещенные в конце рукописи. После того, как церковь Еркуересни в Ереване пришла в упадок или была разрушена (точное ее местоположение не известно), предположительно, в начале XVIII века рукопись попадает в монашеское поселение Св. апостола Анании, в церковь Пресвятой Богородицы, выстроенную в 1693 г. на средства купца Ходжи Паноса, и нарекается по имени этой церкви, поскольку именно здесь она хранится много лет. В 1911 г. Евангелие было перевезено в Эчмиадзин, а в 1939 г. находит свое постоянное пристанище в Матенадаране им. М. Маштоца.

Рукопись представляет большую ценность не только по причине надписей, свидетельствующих о ее целительной силе (в памятной записи это отмечает также заказчик реставрации рукописи Нерсес Мокаци), но и благодаря своему примечательному орнаментальному убранству. Несмотря на то, что некоторые из миниатюр вырезаны, тем не менее имеющиеся изображения позволяют видеть в них орнаментальные решения, характерные для киликийской школы миниатюры (зооморфные основания хоранов, одинаковые изображения животных в верхней части титульных листов, повторяющиеся складки на одеянии евангелиста, архитектурный фон и др.), своеобразные цветовые сочетания, использование золота и пр.

Примечателен также переплет рукописи. Он выполнен из темно-коричневой кожи с тиснением, верхняя его створка украшена около сотней заклепок (некоторые из них утеряны), а в ее центр помещен металлический крест с памятной надписью.

В настоящем альбоме-исследовании еще одна из замечательных рукописей Матенадарана подвергается научному рассмотрению и передается на суд взыскательного читателя.

«ZORAVOR» (Powerful) GOSPEL

Summary

№ 4060 manuscript «Gospel» of Mashtots institute of Ancient Manuscripts Matenadaran, which is also famous with the name «Zoravor» (Powerful), was probably written and illustrated from 13th to 14th centuries in Kilikia. Approximately at the end of the 14th century the manuscript was removed to Yerevan where it was bought by Hakob, Yerevantsi Vishap's son, and was given as a gift to the church named Erkuseresni. To this, testify the creator's and the receiver's memoirs listed at the end of the manuscript. After the destruction of Erkueresni church of Yerevan (the exact location of which is not known till now), probably at the beginning of the 18th century, the manuscript was kept in St. Astvatsatsin church built in the desert of St. Anania Apostle, in 1693 with the help of Khoja Panos and named after him because of his staying in the place for many years. In 1911 the Gospel reached Etchmiadzin, later in 1939 it was permanently moved to Mashtots institute of Ancient Manuscripts Matenadaran.

The manuscript is not only extremely valuable for its testaments about the power of medicine (in the memoir Nerses Mokatsi who renovated the manuscript, testifies to this fact), but also for the remarkable illustrations of its miniature ornaments. Despite of the fact that some of the miniature illustrations are damaged, the remaining pictures are especially notable for the special solutions of Kilikian miniature (animal printed anchors of altars, similar animal printed images inside the head ornament of the title page, similar illustration of the wrinkles of the preacher's clothing, architectural base, etc.), for its unique color solutions with the use of gold, etc.

The cover of the manuscript is very remarkable too. It is constructed of dark brown illustrated leather, the outer binding of which is ornamented with over hundreds big and small boughs (ball head nails, several of which are fallen) and is strengthened with the metallic unscripted cross in the middle.

This album-study scientifically investigates one of the remarkable manuscripts of Matenadaran and presents it to the public appreciation.



Կարպիանոսի դիմանկարը գլխագրերի կենտրոնում
(ՄՄ ձեռ. Հ^{որ} 4060, էջ 2ա)

ՄԱՆՐԱՆԿԱՐՆԵՐ




Կարախանուսի դիմանկարը գլխագարդի կենտրոնում
(ՄՄ ձեռ. Հ^թ 4060, էջ 2ա)



Խորան (ՄՄ ձեռ. Հ^{որ} 4060, էջ 3բ)







Խորան (ՄՄ ձեռ. Հ^{որ} 7644, էջ 4ա)



Մատթեոս ավետարանիչ (ՄՄ ձեռ. Հ^ա 4060, էջ 11բ)



Մատթեոսի Ավետարանի անվանաթերթը (ՄՄ ձեռ. Հ^տ 4060, էջ 12ա)



Մատթեոս ավետարանիչ (ՄՄ ձեռ. Հ^ա 7644, էջ 11բ)



Մատթեոսի Ավետարանի անվանաթերթը (ՄՄ ձեռ. Հ^մ 7644, էջ 12ա)




Մարկոսի Ապետարանի անվանաթերթը (ՄՄ ձեռ. Հ^ա 4060, էջ 77ա)




Ղուկասի Ավետարանի անվանաթերթը (ՄՄ ձեռ. Հ^Պ 4060, էջ 121ա)



Հովհաննեսի Ավետարանի անվանաթերթը (ՄՄ ձեռ. Հ^ա 4060, էջ 192ա)





Լուսանցային մանրանկարներ. Հովհաննես Մկրտիչ
(ՄՄ ԺԵՆ. ՀՊ 4060, էջ 15բ, 39բ)





Լուսանցային մանրանկարներ. Ավետում
(ՄՄ ձեռ. Հ^մ 4060, էջ 122բ-123ա)




Լուսանցային մանրանկարներ. Չաքեոս (ՄՄ ձեռ. Հ^մ 4060, էջ 175բ),
Յիսուս Քրիստոս (ՄՄ ձեռ. Հ^մ 4060, էջ 199բ)



Լուսանցային մանրանկարներ. Պողոս և Պետրոս առաքյալներ
(ՄՄ ձեռ. Հ^տ 4060, էջ 240ր-241ա)






ԳՐԷՔ ԳԻՏԱՆ
 ԼԷՔ:
 ասխանի՛ ետ
 յն ժողովուր
 և: արիւն դո
 րայ մեր և ի
 որդւոյ մերոց:
 սմամարն ա
 ոյա զբարաբ
 ալն:
 յն քան և ա
 տի նեռս զի
 սչ եացի:
 յն Ժամ զին
 ու որքն
 զյն յապարա
 ողով եցին և
 նորա զամե
 զգուն դն:
 և աջին զնա,
 ն վնովաւ
 Դ Կար մեր:
 և ալ պատկ ի




ԵՐԵՈՆՈՐԷՋՆ
 Ե՛րբի մար
 ցորեն յերկինս:
 արպէս մովսէս
 րապոյց զաւ
 րապատի՛ նոյն
 արն րան ալ
 և որդւոյ մար
 ամենայն որ
 րայ ինա՛ ընկալ
 անսն յաւ իտե
 ականս:
 ցնպէս սիրեաց
 շխարհ: մին
 դինիպ մի ա
 : զի ամենայն
 առայ ինա՛ մի
 : ալ ընկալ
 անսն յաւ իտե
 ականս:
 և առաքեալ
 որդի իւր յաշ
 Եւ դատ ևս









Ջարդագրեր (ՄՄ ձեռ. Հ^ֆ 4060, էջ 16ր, 22ա)



Ջարդագրեր (ՄՄ ձեռ. Հ^ֆ 4060, էջ 46ր, 91ա)



Ջարդագրեր (ՄՄ ձեռ. Հ^ֆ 4060, էջ 102ա, 160ր)



Ջարդագրեր (ՄՄ ձեռ. Հ^ֆ 4060, էջ 209ր, 48ա)

ԱՐՍԵՆ ՀԱՐՈՒԹՅՈՒՆՅԱՆ
ԱՐՓԻՆԵ ՍԻՄՈՆՅԱՆ
ԶՈՐԱՎՈՐ ԱՎԵՏԱՐԱՆԸ

АРСЕН АРУТЮНЯН
АРПИНЕ СИМОНЯН
ЕВАНГЕЛИЕ «ЗОРАВОР» (Всемогущий)

ARSEN HARUTYUNYAN
ARPINE SIMONYAN
«ZORAVOR» (Powerful) GOSPEL

Լուսանկարները տրամադրել է
Մաշտոցյան Մատենադարանի թվայնացման բաժինը

Շապիկի լուսանկարը՝ Հրայր Բազեի

Խմբագիր՝ Գևորգ Տեր-Վարդանյան
Սրբագրիչ՝ Արսեն Հարությունյան

Համակարգչային շարվածքը՝ Ա. Հարությունյան
Ա. Սիմոնյան

Ձևավորումը՝ Մեն Հովհաննիսյանի
Հովհաննես Հովհաննիսյանի

Էջադրումը՝ Սեդա Հովհաննիսյանի

Կազմի ձևավորումը և
տեխ. խմբագիր՝ Արամ Ուռուտյան

Տպաքանակ՝ 1000